

國朝
書
館
藏

第冬積陰門徑闌如方詮次膠西高南村集且就

而雁下門人朱淵亭孝廉手其先人冰壑先生詩

集感雪跋涉千里以來予論定為傳本予不識

先生昂生灤源講席淵亭從予遊又常聞之郡士

大夫因知先生最悉先生身次超絕於世故無所

棲居饒水竹文酒跌宕重交誼意氣自許家不中

牙押霍輒盡晚歲南遊攬擷江山之勝歸益肆力

於詩古文詞者作富有而不自收拾夏潦敗屋漂

沒一空惟詩詞十餘冊幸幸他所淵亭得於先生



沒後欽撰以存於世今觀其詩才思橫溢若洪河
千里一曲不妨泥沙俱下謬用淘汰得如千篇釐
為六卷嗚呼是足以傳矣先生與南村相友善書
翰之工及繪畫篆刻並推一時而其為詩奇麗恢
詭深沈雄放亦畧相伯仲以余之不敏先後不半
月於禿毫凍硯間獲兩供編綴之役文章有神交
有道非偶然者因序以歸之淵亭而慨及之乾隆
癸未冬至後五日德州宋弼書於都城寓舍

今人粗諳聲偶為韻語輒詡詡自負無識者或從
而推附之曰詩人詩人夫詩人之名不易稱而又
非其所樂以自居也士苟得志於時入秉鈞衡
出正方面固將孜孜密勿宏經國又民不朽之盛
業即出其緒餘形為歌詠若唐之張曲江裴晉公
宋之韓魏公歐陽文忠是可以詩人槩之乎下而
一官一邑厥有常職苟思於物有濟必有所建樹
以自表見不沒沒也則亦不得以詩人槩之若第
曰詩人而已則必其人凡隈陋考尸位竊祿德望

無稱於人功烈不著於世乃挾其彘彘譏才與章
句之儒山林枯槁之士爭衡於一字之穩一韻之
工曰吾且能詩而天下後世誦其詩轉益鄙其人
故夫詩人之名不易稱而又非其所樂以自居
也余讀冰壑先生之詩其才思之駿快魄力之闕
深風骨氣格之雄渾儁上淵源陶謝注挹蘇陸不
名一格卓爾大雅足稱詩人之名無負矣而未可
以槩先生先生少厭攻舉子業讀書論世為有用
之學時無薦雄因自放於泉石文酒間日偕羣從
昆弟賓客門下士為詩以自娛乃其豪氣壯情則
時於悲歌酣詠流露而不可沒俾其出而有為樹
立必有可觀者是故槩先生以詩人先生不徒為
詩人也顧舍詩人無以名先生則詩人之名先生
不得而辭而先生之心固未必樂以自居也先生
已矣九京有知其以余為知言也夫乾隆甲申春
二月既望萊陽張象恩序

冰壺詩集卷一

歷城朱令昭次公



五言古詩三十三首

飲酒

余雖不善飲頗解飲中趣近亦淺嘗之蕉葉剛三
注百篇未必成大道實相遇人生苦營營形軀瘁
朝暮富貴豈能久信似草頭露昔賢陶淵明高風
余所慕息駕獨養閒盤桓倚松樹物我已兩忘何
處著思慮

贈蓼莊九兄

霜鷓空大千無非金色臂人生幾百載動作千日
醉吾子重心骨杖屨喜類至鬢眉老烟霞而舍郊
島致南山皺蛾眉清言恣披對歲晏冰霜繁殷紅
落芳棣天時豈能違有說空救墜德薄難感人才
多易招忌鬱鬱千里心今古同洒淚俛仰如桔槔
形軀不堪瘁買山亦堪隱卓錫苦無地與君好弟
兄孫宰羨高義悲歌行路難慷慨發長喟今也共
秋室塵埃謝羈累雨窓賦脊令聊使我心慰

山泉

冷霧生荒泉刀光磨古水蕩湧紅鏡天五色摩尼
似挈雲千株松太陰黑龍委蒸氣發嵌窟金沙漱
寒泚盤渦轉哀鴻花蔓濕菘苳黃猿引白兒挂飲
崩崖裏羣魚擁銀劍竹蛇掉青尾霞醉樵嶺頭雨
嘯佛叢趾急聲飛嶮谷野火燃妖鬼貪愚與淫盜
千古同淪毀黑髮蘆綿色春冬一迅駛超絕萬劫
緣天瓢洗眸子

輓天相和尚

影相連娟幽人厭塵色雅契清淨緣好借江湖手
長絹寫渭川一花與一竹隨處宜通仙不少肉食
人鄙哉難與言碧華出東嶺素絲咽冰天籬腰蟲
語細醉薦清陰眠

秋杪過張榆村竹林草堂

歲華如長江滾滾去無已寒涼九月末哀鴻叫湖
水平臯木葉脫流泉繞壚里乘興過子雲匏樽載
麴米紫苔巷曲折籬障謝埃事秋堂氣澄穆竹陰
晝清美抗懷發高論天巧切元旨斂氣歸恬寔好
古寸心是大雅久寥廓眼底惟吾子只應頻過從
戲作雲龍比

喜蓼莊九兄過訪

高館一夜雨風篁攪清眠忽忽成內熱伊人何處
邊詰旦聞剝啄披衣從倒顛睽違計五載滿懷酸
冷填舊聲還復識鬚眉乃蒼然因之感時序秋高
鴻雁天

秋懷

積暑不可任乃與秋風期秋風颯以至何意增悽

花松門碧塵尾石路青狼牙美人踈秀姿迴異羅
浮家古株土幔隱冷萼浮烟透最難荒澀地潔身
無疵瑕空影漾流泉寒香零玉沙老此謝入境靈
山寂無諱

夜聲

微醺醒中夜此時誰共語靈臺宵然清聲動歷可
數輕度蕩池風斜侵洒窓雨琤琮佛閣鈴幽軋鄰
家杼杵擊喧邏兒剪擲鏗縫女隆隆冥行車橐橐
宿春杵梁巢語乳燕橐果齧飢鼠火爆蘭檠膏槽
滴槐葉醋捫腹雷轟春傾耳蟬吟暑漏壺行欲闌
巫鼓來何許百蟲蕭然飛靈鵲振其羽衆音等天
籟真韻謝律呂不寐獨何為聊以詩自叙

月下吟

倚欄看明月恰如白玉盤更疑瑤臺鏡飛上高雲
端今夕舒光彩磅礴極清歡綠榕音策策紅桂影
攢攢小池芙蓉冷的歷露珠溥桐布短衫潤葡萄
長帶寒握管得新句書之青琅玕仰視天如水列
星燦金丸悠然發清嘯桐風吹夜闌

閒中樂

猿婢燒竹枝蠻童舂玉屑日出天東頭紫霞淡蒙
滅木蘚桐幹老石泉水聲活曝背依中庭桃花滿
肌骨

郭外吟

金風颯然發萬戶送砧杵綠油轂酥車鱗鱗詣曠
豎紫霧迷空林鳥音如吳女龍峰相疊歷碧錦蘚
苔聚秋草白侵烟野蘼紅泣雨蘆雪與楓霜吳濛
暗沙渚日落漁庵昏青光點松炬

南山晚眺

急風颯然來亂葉辭林杪寒泉飲清猿野霧失歸
鳥黯淡黃昏天荒涼青櫟道烟麓秋氣森燐雨洒
空草

漫吟

瓦舍明螺青深居樂靜業無客過間門經旬少款
接生涯雖寂寥意緒頗寧恬倚窓見遠峰青霞自
明滅天鏡開秋塘冷波魚翠擊陰渠蒼蘚花香徑
紅蘭葉奚奴進銀瓢蜜醅甜沁舌筍刀割霜鱸淺

淡桃花雪偶成五字吟投入藤香篋

秋夜

微風響桐林樓角鳴秋鴈淡雲時往還桂魄流銀
漢塘水空濛濛蘚壁陰蟲喚小坐侵夜涼寂寞共
蓉院

海懷霞想齋對月

秋入琅玕屋窻几各瀟洒雨氣寒冥蒙釘簾玉青
下俄驚碧華流孤月出雲罅快覆紫萸缸香濃老
春瀉莎露閃熠燿涼颺起花朵踈漏報銅籤蟲吟
滿柵舍我欲夢蝶蝶清光許枕藉

塞上曲

慘慘寒日沒北風捲蓬根控弦一百萬揚威古玉
門回首指陰山殺氣成黃雲

初冬紅鷗館小集

葛黃石雲飛青女發嚴令闕關水晶域人琴各清
淨翠筍排霜脊鐵蛟曲梅甌飄然世外心如施大
法鏡時招烟霞徒隨緣極清興月旦罷評品蠻觸
豈凌競小春天氣佳即事成新詠琅玕翠餅滑蘸

書紫毛硬當筵恣拍張三雅助觴政愧我厨饌拙
土芝充餽釘奧論發天巧放懷得真性諸君盡瑚
璉半酣雜賢聖恬曠心自得衣冠付優孟短景忽
西斜烟林送晚磬言歸不可留一語要君聽外物
雖牽纏中懷須達命天親我輩饒昆季芝玉映况
復文字飲藹然篤家慶無事須過存日開蔣生徑

登臺望南山秋色

高臺涼雨歇南山出新姿眉黛何了了白雲如凝
脂青塔間紅亭木杪相參差連巒堆濃影林霽恣
紛披一峰忽峭拔萬丈寒青欹西風晚更爽橘綠
楓紅時於此興不淺數舉葡萄卮

彈琴

涼館飛秋雲晝天氣晃朗寒水七條白泠泠流指
上浩浩海之深瀾瀾漢之廣美哉雙荷葉天地亦
蕭爽騰霄呵銀鹿揮劍割珠網竺僧眉稜尊梵宮
有真賞湫矣慶安世雙鳳勞深想高風吼霜林紅
葉隨如掌

題屠晴川小照

山水鬱三浙雄雉多俊人屠君氣嚴重尤是天廟
珍上帝賜金箸高文落編鱗遠官夜郎北百里才
難伸唱酬共僚吏歌呼驚四隣清詩數百首瑩然
醇其醇射工暗含沙杜宇催歸頻霜蹄偶然蹶豈
必問所因風月西子湖短棹劃紅蘋陰雨西塞山
小桃偃烏巾箬酒催壓榨苔魚待垂綸得失泉盧
等且鬪尊前身我年已三十緇鬢華蕭晨求友邈
難得顧盼生酸辛偶探王屋水同觀石橋鱗渾如
十年舊忽接言笑親霞氣迴騰上玉性惟溫純拄
杖叩虛室蠟屐穿荒榛結交重心骨彈冠寧足陳
披圖見君意落落青田真大句擬抒發寒餓誰遵
循未能扶鳳凰要當縛麒麟時維孟冬交瘦篁霜
脊斂擁鼻坐長漏短燭餘寸銀因思西涼簿肝膽
何輪困泥蟠會奮飛焉得終沈淪獨憐客寂寞夢
馳越江濱

雨後同耿柳村分賦用孟襄陽題翠微寺韻
掃却千里黑天東發朗照晴寒逼樓庭石臺獨延
眺攏膝儘疎閒林樾致幽妙野溪跨驢人梅邊足

清調春信在何許
拈花自微笑
老寺鳴齋鐘
凍鴉起烟燒
統郭青翠滴
將子躡雲嶠
浮慮不相縈
松杉答歌嘯

西瓜

火雲蒸肉山一月
眠高樓金風颯然至
搖落青門秋老橐
擔肩頽傾筐白汗流
大者如盆盎蒲鴿色
油油刀落玻璃雪
瓢開芙蓉鷗玉膚
渾是冷漆子了不稠
鬆響亂鳴齒肥漿
亟充喉沐髮甘泉波
洗心聚蜜洲水精解
腰帶珊瑚明指瓠浪
誇蜜林檎詎意安
石榴梁道重公器
伊水思故儔蒼蠅自
何來黃瓠殊可羞
今茲北窓下息機
與天遊招邀弟兄輩
賓從皆清修畫簷雨
滂澎烏柏紅綢繆相
與微瓜事聳肩共冥搜

村居

人各有所嗜
惟別酸與鹹
暢言發心聲
何必口三緘
屏居來孤村
白水涵青巖
荒園繞竹柏
矮屋圍松杉
黃鸝駕雲翅
何由遭刺讒
客來亦接對
敢自誇不凡
但守故楮堆
然薪學畢誠
赤脚挑茶籠
長

鬢攜藥鏡幽蘭長土階愛護寧當艾書閣或獨坐
凜凜冰霜銜出門為利者若彼心貪饒龜毛雜兔
角其事神明監時維春三月梁燕語呢喃擬作前
溪遊無勞張繡帆柳烟蒙綠罽杏霧翻紅衫瓦壺
自斟酌歸來醉語話倚柱覓新句斑管手自摻細
風揭簾箔月華七寶嵌夜半風雷作龍飛太阿函
天數杳難測我欲詢巫咸

九日登千佛山

天高秋氣清賓鷓來重九曳杖登南山三兩忘形
友數峰削寒玉覽眺一搔首陰洞潛古龍卧碑辨
科斗采菊石磴陰小立西風久羣鴉沒空澗細黃
落檉柳眼前風物佳塵夢復何有滿引銅駝杯醉
作金鯨吼野興方凜嶸羲輪已沒酉

初冬紅鷗館小集用沈休文長歌行韻二首

燕居方緩腸不知急景變古梅放南枝恍如得清
彥寒風穿竹林生翠冰粉箭翻然下重幃紅珠閃
輕電籬菊香有餘畦蔬美堪薦亦似江南春園林
色葱蒨折簡邀賓親欣作煖爐宴真香出鳳槽醉

笑旃檀殿風流羨王恭
蘊藉慙盧綯君等類
相過
追陪我不倦

清霜染高柳細葉舞黃雪
夕天發紅霞蒸作珊瑚
結中心懷稔年值此獲稻
節人生得溫飽萬事本
無缺蟲臂與鼠肝盡逐浮
塵滅忽忽感風露人壽
稀耄耄佳時但為歡判與
世緣絕清話正未已杯
闌忽言別塞鴻響高空淒
音朔地裂休辜歲寒心
尊榼日當設

雪晴訪友

林鐘敲遠夢冷臥在虛室
髯奴開樓窓山脊雪盈
尺白甌裏疎鬢徑跨青驢
出登登石路滑行行泥
沒膝主人敞荆關禮法謝
桔槔稍傾蕉葉三更闌
茗椀七椀秤飛秋電談犀
掉晴日無能笑荒滄謬
說工詩律金板銅雀瓦老
臍光乞粟抽思方一綫
驚君已擲筆猛氣佐豪才
一洗寒餓質句飛月脅
寒字結星心逸濟南風雅
窟在處名泉溢况當初
風發金苞綴春橘好景莫
空負百年轉燭失心知
無幾人惟君最親密相期
在古文孟韓重儔匹莫

說繁華相低頭正捫蝨

冬夜即事二首

八尺竹方牀上鋪紅氍毹寒漏一何永冥坐心悠
然窓光淡月色梅英紛素妍活火候建茶裊裊青
檉烟

夜深氍毹冷蓬室涵清虛時挑燈穗紅手繙黃老
書羣動此焉息澄懷祇自如何處寒厖喧朔風來

遠問

冰壑詩集卷二

七言古詩四十四首

讀李白詩

白也天才空萬古開元輦下真龍虎拏雲心志四
十年大闡風騷作詩祖天球不留斧鑿痕鳳凰抉
髓中粹溫古調宏聲太元氣雄華麗彩總持門公
乎一生惟嗜酒瑠璃炆舌珊瑚口千篇萬篇翻水
成金薤琳琅六丁走上騰光燄霄可摩心骨盪出

歷城朱令昭次公

銀江波刺手鯨牙拔不盡揮劍可斷生蛟鼉骨驚
神竦呼百怪信是崑崙此宗派碌碌餘子難為儔
超爾舉頭向天外何意杜陵老詩翁恢奇鬱勃與
爭雄二公在天如日月並轡相參元化功盛名那
復有高下花象火龍持大雅如何福廼有元郎止
據篇章較多寡此優彼劣摠狂詞雙重權衡韓退
之知言三歎服黃介論文正不當如斯後世陋儒
皆肉眼摘句尋章守殘簡仰人涕唾心自甘侈口
謗傷顏不報可憐身微等野蒿欲撓一草揺蟠桃
金尊却酌謫仙語蠖蟻何足知天高

終南進士行

黑松洒陰螢雨寒狂鬼亂嘯秋風酸綠袍進士決
電皆枯蛟影閃蝦蟇幡青籠無光濺古水怒裂鬼
膚吸鬼髓鬼子星奔鬼母號老梟吐火巢中起鬣
黷陰空刷愁色銅魚注血凝腥碧業海忽昇金柱
紅可憐滿地灑髑白

楊花曲三首

廣陵三月春可憐團紅細綠敲寒烟柳絲不解挽

行客滾滾輕花處處圓梨腮杏頰吳江女半臂金
綾踏春去迷濛雪浪天正晴紅樓到處鶯花主畫
屏銀案鸚鵡螺千金一聽玉人歌醉粉生香綻濃
笑芳心不識春如何薄陰小樹啼嬌鳥堂上甌餽
睡不埽爭教紅粉不長嗟年年迷却王孫道

越溪春水浮天涯溪上風吹楊柳花花飛滿空無
定處曉天紅日蒸銀霞懷春女郎出畫閣燕燕差
池深院落燕高無力共翩翩却倚東風承不著縈
簷撲檻春雲香點點鬆綿鋪玉牀綠窓悄良釵情
緒驚紅如雨隨飄揚自添桂火銷螭印三十六鱗
香芳信侍兒為下水晶簾門外春光深一寸

妾家住近橫塘隅鷓鴣文繡紅羅襦蛾眉曲掃螺
子黛耳後明璫大秦珠蘭風縹緲吹晴晝吹上前
堤飄弱柳軟絨細毳忽成團點染粼粼玉壺酒花
開花落春江涯蕩子如何不憶家鞦韆南院聞笑
語風月東鄰響箏琶銀罌絡絲汲銅井翠髮紅顏
鬪華景那堪夢覺綃帳寒午院無人亂春影

贈孟生

北風吹冷三方紫，鳳脰燒雲突。厦裏夢魂才寄寶，
連環萬箇琅玕攪。人起攪衣，跌坐綠羅茵。窓上一
枝梅影新煎茶，初熟聞客至。風流况是襄陽人，余
時閉門久謝客。輪蹄不過幽荒宅，淒晨何意君能
來。感激胷腸喜折屐，十千買酒蘸脂坡。黃雀肥脆
金綿拖面皮，頰熟雜言笑了無。冰炭惟春和庭南
松柏行，且拱二十年來真一夢。眼中世路千褒斜，
陳迹團團磨牛踵。豈不願封萬戶侯，豈不願識韓
荊州。俯仰從人塵土下，枉使腰曲如筍篴。埋頭讀
書事，非賤世上無人具。天眼不知道義屬，輕肥葵
藿真同大官宴。一丘一壑羨君家長衫紫，領巾角
斜小齋亦復有風味。江東美酒嶺南花，亂烟鴉影
寒林外。日射飛泉銀葉鏗，窈然於此會高深。年年
爛醉青山在。

題趙松雪畫秋郊聯騎圖

五色粉圖蓄天全，生人活馬驚竒權。神游眉目光
顯額，豹骨龍膺不受牽。黃雲絕塞萬丈淵，騰蹕何
用蟠桃鞭。老奚滿身錦花纏，衝風走響鐵連錢。坡

聳狼牙石路墜一時人馬誇雄妍
岷然縱轡爭相先洛陽秋光遠
眈鯨刀吹不入寥寥天指顧八極
心飛懸一噴生風流玉烟夕陽亂
葉催鳴蟬噫嘻噓曹霸韓幹一去
隨雲霧羣工舐筆如星連趙生
妙手到今傳直欲齊美開元天寶年

浴馬行用東坡題韓幹十四馬圖韻

滾塵羣馬翻碧蹄芳洲兩岸裙腰齊
萬斛清泉奔渴吻波頭迴立當風嘶
圍人不解孫陽顧宛頸交鬃似相語
欵然驚作逐電行崩剗寒水玻璃聲
越坡陀矯如鶴短鏃老莎供俛啄中有一
尺如獐龍掀濤出沒生雲風雄心逸德豈
凡馬蘇軾詩篇韓幹畫如今無處覓蘇韓
世人漫作駕駘者

和家彝存兄釣突泉詩同張榆村

此泉發源十萬里玉龍走赴歷城水
掉頭不顧洞天門采秀仙公卧不起
神元疏派溢銀砧珊瑚碧樹紛凌臨
摩尼變色爛蒼昊三寶漢流空萬音
鵬鯨摩宰釀白霧天路盲瞶忽號怒
目瞠口吻當驚瀾菰撒雷滾滾鉛素幾
年魂夢遊落星何意得便

來紅亭芝草琅玕蔭欄檻劍鏗倒插南山青窮搜
窈窕首類頷石眼環環覩玄宮欸然激成霹靂焦
一時天地隨舒慘縵纓崩豁光鬢鬚瑩骨清寒輕
世華疑踏三山六鼉背陰雪吹作連天花便欲乘
風駕五兩那知海髓此奔放潮打昏門風雨來西
陵萬鼓秋濤壯馬首東來嘶冷烟白魚赤兔爭獐
妍赴吻亂流動形影恍惚霜葉凋秦川芙蓉千樹
明沙脊掩映紅漣與紫液向空漱轉明月魄從中
掬出玻璃魄長橋高跨飛鳥通澄泓直上香光濃
神仙樓閣半空起塵壒幻出水晶宮憑君為和滄
浪曲鳧鳥忘機自飛浴拈鬚照鬢鏡中身拂拭盤
陀藉秋綠蒲衣道士隱者流伏犀貫腦蒼眉修留
我品泉截紫餅一啜七椀風颼颼經過福地真蕭
爽歸然水亭足華敞穿碑綠字蛟螭盤金薤琳琅
照滉漾漁洋老宿屬前塵六十年來未有倫吾友
放歌騁雄鷲吾兄綴句標清新朝來撲筆慚鸚鵡
行近泉邊洗塵土聊憑一紙徐凝詩敢學風雲逐

龍虎

題王寄堂小照

幽并年少真男子，水剪瞳人眉刷翠。畫工亦是不
凡材，粉本能傳天廟器。神寒骨重雄且妍，石牀高
據銀塘邊。肉山不動火雲熱，青鸞垂翅涼陰圓。燕
姬倚扇光金沫，趙女拈花羅袖濶。漫捲紅紗開瑣
窓，半身美人秋水活。朝雲度館列仙家，柳濃草艷
矜繁華。石渠本是揮翰手，應點風流玉畫叉。知君
別自凜冰抱背使，朱顏坐中老一樽。傾聽紫雲歌
幾年交，逐紅塵道丈夫二十心。拏雲拳跼誰教氣
不伸，提攜玉龍踏哮虎。世間有此非常人，馬周昔
作新豐客。寄口中郎嗟落魄，忽雕小說干皇聰。解
鷹籠頭拜恩澤，飄飄司馬眼不寒。豐香瘦豔鎮常
看，騷裏蹄蹶亦偶爾。刀稜翅勁飛何難，君不見相
如好色文君美。直辭諫獵書前史，英雄端合伴紅
裙。何異維摩妻法喜。

孫子師惠佳墨即為書數紙

孫郎三十工文翰，插架萬卷輕腐儒。塵俗所好不
挂眼，家雞六紙能臨摹。筆鋒清道絕習氣，奔放有

如生馬駒我亦蚤年指畫肚濫將名字東西塗忽
奪嘉惠轉惶懼烏玉玦冒青霞裾飛光吐豔制作
巧輕堅細膩松之腴金犀蟠拏固入妙未若小海
龍銜珠會當贈世文章伯暗投明月吾何須要我
真行書數紙春蚓太細秋蛇粗字青石赤搨岫屢
盪盤孔鼎遺形模漏痕釵脚得其意匪惟周折隨
步趨點畫老硬得力處凍蠅寒雀須剛除草堂娟
娟花竹影管城子倚紅珊瑚蠻溪切藤光於水而
此佳墨不可孤午窓偶試病風手掣然黑電流不
枯行書縱橫兼大草風雨驟至龍蛇驅擲筆大笑
叫竒絕墨豬母乃嗤髯蘇贈君還復留君飲一盤
芍藥煎瓊酥

遊禹登山

萬峰如劍磨青銅丹崖翠嶽風穴通當時神禹登
其上古祠雲黯黃金龍此日勝遊契飲具雙龜榼
與琉璃鍾是時已屆仲商節林麓森秀猶春容湍
聲洶湧轉絕壑石氣淒凜吹寒風倏驚濃雲萬鳥
集日脚頓匿焉支紅銀江萬斛供一瀉瀑流擘峽

奔長虹須臾天展研羅碧餘霞流艷蒸洪濛罔巒
出沐變氣色高下草樹皆青葱摠衣高頂發清嘯
斜陽明滅金芙蓉高天鴈叫下涼葉佛閣已報黃
昏鐘茫茫人物苦物役幾曾勝地留幽蹤曹騰一
醉不知處夢破月落秋山空

雪

寒威一夜凝筋骸太陰沈屯劃不開驟捲猱颯掃
天路勢猶怒虎摧狼豺亂飄雪片大如手驚閃眸
子縈髯顛槍佯臂振無定相翻光舞影頻週迴白
帝行天盛羽衛六橫龍鳳飛八垓老藤怪樹失形
影深山天澤無垠岷一片陰機誰簸弄致令萬徑
寒皚皚竹樓高空望不盡凌風思上呼鷹臺鼈背
蓬瀛恍在眼向遠舉袖招洪厓兒女紛紛漫比擬
崩騰其勢牛可埋或云佳兆見三白螟螣遺種都
傾催方冬一雪殊不足龍公有約還復來及此窮
節最慘慄鶴柴敲壓書棚堆園林著花春色滿長
鬚赤脚皆懽怡指顧松嶺黃千葉傳言蠟蕾芬東
齋妓圍肉障豪家事衣裳都用狐青裁坐使暄風

味氣候莫如放飲三百杯當日歐陽競白戰漫欲
對壘誠難哉安知近代無宋玉別逞大句飛狂才

泛舟

湖烟濕雨鮫綃軟漠漠遠山眉黛淺藤帶筍巾生
細涼香槽酒壓銀船滿婀娜柳絲吹碧空蘭橈載
散穿蓮紅鴛鴦癡睡喚不起潏灩金波迴晚風漁
村幾縷殘霞裊日落沙明人語悄一聲欸乃何處
聞驚落波心月鉤小

牧牛歎

返照在高樹歸牛度陽坡一犢年然赴其母老特
反顧情何多牧兒見之亦心惻人間母子當如何

駿馬篇

河星麟種矜騰驤紫艷灼灼金睛方四蹄趁輝碧
玉冷桃花峻額珊瑚頸背壓重重朱雀毛骨骼隆
豐小桂條盤龍絡腦獅蠻轡寶鐙錦鞵五花麗驕
嘶噴嘈風颯颯萬里鐵關霞影流凌空不見織埃
起矯鳳迴鸞詎堪擬追電飛上西崑崙玄猿奔走
綠羅躡大漠茫茫沙似雪朦朧一片朔天月壯士

苦戰陰山陰誰為市駿千黃金

鷹

五門關外邊風高鷲鳥搏空紅錦毛金剛純精表
天質電眸礮礮明秋毫斑鬣蛾眉鐵鈎嘴青骸紫
臆花頸美瑤光星散紛婆娑猛氣雄姿孰可比五
采華絆赤銅鈴璇璣金鏗響玎玎尺蠻絨綠條
軟籠雕七寶排朱櫺巨海瀕洞浪飛雪遮却秋空
一片月神威直欲截鵬鷗莽蒼荆榛自摧折大荒
凜冽飛肅霜十二健翮摩空蒼雲披霧裂虹霓斷
老拳下擊霹靂忙杉雞蒿兔走無路虎竹龍沙亦
却步不徒鮮食慰如黃萬里玉京數迴顧

苦雨

壯陰黯黯狂飈吹金蛇亂掣光陸離急雨紛射如
萬弩廬峰飛瀑喧階墀天鼓砰破地軸裂羣龍怒
戰玄黃血卒暴莫挽銀河傾蘊隆誰令息壤抉三
日已往胡不休野老吞聲空淚流禾黍田間盡汨
沒登場亦已全漂浮更苦茅茨易顛仆淋漓下濕
復上漏積薪已竭晨炊艱婦子嗷嗷泣相守對此

年光心若煎桐槽賴有酒如川醉來欲訪崑崙柱
一為梯雲補漏天

秋夜小集

雲開瑪瑙轉斗魁露零仙掌寒皚皚鰕鬚簾外錦
塘淨雲母屏開銀漢迴水蓼冷花紅霧漾蟪蛄淒
聲足幽曠汗雨全消黃葛衣蚊雷不動紫綃帳天
南宋玉易悲愁澄景蕭疎檻外收鶴影冷翻丹井
月鴈聲遙帶玉關秋紫陽花發天香送葉下梧桐
老青鳳誰家橫笛弄秋聲商飈捲起石鯨動空度
如水涵汰寥聲聲金柝出城坳題詩閒搦青漆管
獵獵吳箋盤墨蛟糟牀酒滴真珠豔琥珀杯醲香
泛激十二天街冰鏡懸興酣起舞蓮花劍

秋池看芙蓉

昨夜西風吹涼雨林塘一尺泉生乳石欄干外木
蓮花落蕾壓枝已半吐膩脂瓣瓣色未濃費盡花
神點染功正似美人醉初醒暈生丹臉曉妝慵水
明玉潤天然色可堪招飲江頭客芳心不肯嫁東
風綠蠟微裝淡琥珀何人為主芙蓉城記否當年

水壘詩集

沈氏詩集
清編修周永年
進呈原鈔本
兩卷全

石曼卿幽人本自多丰韻此花開向豈無情淡容
冷韻足憐惜折取一枝近瑤席小蠻為洗玻璃杯
晚來米汁凝缸碧

桂花

玉階碎影秋綽約天空為捲浮雲幕素娥夜卧清
虛宮老蟾不守寒英落蒼苔如錦鋪微霜仙風淒
冷真珠萼娟娟夜倚青壁枝香霧著人清入膜天
將商律吹幽芳月借金波滴小黃別院秋深蟲語
急清陰一片沾衣裳司花天女淨無垢烟裙不著
鴛鴦繡朝來涼雨滿秋庭海棠翻作傷心瘦

將軍出獵用柏梁體

紫髯將軍七尺長廣顙穹鼻拳髮蒼身騎叱撥紅
電光射獵婆陵古塞旁一箭正中雙白狼勇氣百
倍勢莫當涼秋八月飛邊霜沙磧莽莽連日黃百
尺龍旗按七襄鳴金伐鼓羣跳踉將軍怒甚烈火
揚寶刀銀戟聲瑤瑤遊宴不怯北風涼唾絨為幄
界翠行銅龍壓脊雙角張綵繩縈繫若虹翔將軍
高坐據胡牀熾炭炙肉傾肥漿革囊瀉酒葡萄香

駝峰斜割勸客嘗趙女如花二八強貂鼠裁帽錦
繡襦低抱琵琶彈鳳凰半酣出視駿馬場麒麟作
隊滿澗岡此時歡樂未渠央黃花戍上秋茫茫

秋亭雨後

西風吹地百草乾橫塘一片饒荒寒四野碧霜鴻
鴈下淡烟如玉縈秋蘭世事白衣變蒼狗倒提長
劍枯蛟吼髯奴為我解烏犀請貫楊川一壺酒酒
酣叱雲雲不開六丁轆轤送冰雷却卧花亭香入
夢木樨一樹黃筵毼

裁衣曲

裁衣須裁短短衣短衣上馬輕如飛縫袖縫窄窄
袖窄袖彎弓不礙肘短衣窄袖樣時新殷勤寄與
從軍人願即著衣試弓馬破敵長驅邊城下歸來
佩印著紫緋裁衣不比從軍時

寒夜吟

銅笛叫雲華月高千林霜氣風颼颼呼童下簾燒
檠燭玉壺瀉出香蒲桃冰河白魚耀銀尺楚山丹

橘開芬苞解我吳鉤佩著我赤霜袍酒酣更作鸚
鵒舞壯氣虹飛凌斗杓白晝營營縛塵務忽忽寒
景聿云暮不來良夜極清歡世間無藥能駐顏

西園古柏

我家灤水上花木鍾妍秀何年老柏纏苔綠魁塊
勁挺蒞臺右刷雲千尺古青銅花散龍香飛四空
小枝可曲千鈞之勁斡大枝能挂萬斛之洪鐘石
鉗沙錮土膏鍊孤根直與元精通雄犀甲厚皮如
鐵攫攫怒探青豕鬣太陰雷雨滿濃光沁破壺山
紫芽月金精水鬼潛無聲玉鎖交柯流濕螢蚶螺
不漏紅輪彩時飄蛾粉沾衣輕老壺清濤忽浩浩
驚風落子黃珠小不須水浸白龍皮四面重陰除
熱惱柏兮造物生植奇終古不改霜雪姿所惜老
此荒澀地良材迄不逢工師噫嘻吁工師不逢誠
數奇天全樗散夫何悲我亦輪囷擁腫違時宜相
與歲寒落寞成心知

塞寒行

燕子弦勁霜花洒白草茫茫迷塞野一縷黃塵鵬

鶚飛白龍堆下千羣馬黑河怒觸風如刀揮斷邊
雲天更高目盡榆關秋漠漠驚沙萬里衝猩袍為
羨烟麟名不滅休題錦字傷離別一聲蘆管晚淒
淒荒磧鬼燐凍青血

嘗新酒

生酒清於雪煮酒赤如血煮酒頗帶烟火氣生酒
不離泉石味石根泉眼新汲將麴蘖釀就春風香
一醉醜醜萬事已不知月到金尊裏

題白浮山人采藥圖

鏡火山高高萬丈鍊形其上多仙人夜來濃醉不
復醒帳外孰呼祁孔宵尋聲叩響杳然去直到白
雲最深處高崖疊壁森開張老木長藤颯風雨中
有一人三千齡高額廣頰方瞳青鬚開山骨吸石
髓邀我同躡鸞鳳翎長窻理髮徐頰面橫展鷲溪
秋水練何物畫手奪神工貌取依稀夢中見巖壑
到處堆琪花石頭磊磊行徑斜芙蓉爛簇幾萬朵
蒸天暖翠光交加懸流百尺銀龍走石鏡寶奩分
左右別開洞戶激長風一脈根株互蟠紐公手何

來側嶺前衣服朴野稱散仙自願抽身謝天械駮
駕熟鹿歸林泉半岩日高喧鳥雀閒把長鏡劖靈
藥丹芝赤箭蜷龍蛇紫汞金絃結瓔珞采香擷翠
貯筠籟野風吹帽髮脫簪向晚却投谷口宿空天
澹沲星光含玉池生肥倚松枕鹿門烟月春如錦
滿肖志趣本非常那識人間足坎壈咸陽年少豪
貴兒紅牛纓紱黃金羈十載勞勞走塵土蘆花新
艷凝眉髭就君欲問長生訣笑而不答晚寥泖了
知徐福去荒唐空使嵇康羨王烈

春雪

南溪春寒寒乍凝南溪春水結春冰東皇戲手撒
春雪詩人筆點霏霏屑亂逐楊花西復東迷却櫻
桃十里紅勢趁斜風聲雜雨紛紛飄洒春庭戶芳
叢綺陌縈寒烟消遣鶯花二月天小槽酒滴真珠
滾肯使吟肩受淒凜前山後山銀嵯峨高放陽春
一曲歌玉虛有地分一席且與狂奴十分梨花注
大白

書高西園詩卷後

元白有餘勢孟韓無困辭子美骨格老太白文彩
奇可憐太白久破碎文字萎荅而夫離魚子山人
膠西客霜海驚看一鷲飛嗟君不與流俗伍逸氣
填塞無所施脫手毛錐洒冰雪黃金白玉揮如泥
自從詩卷一入手神爽直上青雲梯十宵不睡亦
不困厭宵日日關柴扉快然滿引金叵羅蒼空萬
里驚銀波寒夜無人獨叫絕年來鄙吝都消磨

紫鳳曲

老兔帖天流光^素玉峯仙人吹紫凰紫凰失匹發孤
嘯思入寒雲悲怨長餘音嘶風崖石裂梅花飛春
墮香雪水晶宮殿龍夜愁鮫人學語聲幽修江波
晶寒^晶不流七十二峯疑素秋畫管朱絲不須數轉
入離羣調尤苦空山老嫗叱哮虎隔竹湘靈泣秋
雨冷然無聲似有聲欲與彩鳳相和鳴秦家貴主
去不返碧海三山魂夢斷

棟園大兄遺以古墨喜而成詩

吾兄授我墨三挺其形頗似神禹圭言是樂浪潘
谷製魚胞千杵熟老臍柳枝瘦龍極變相琅玕翠

餅塗金泥什襲至今不少缺風乾水濕囊錦綉摩
挲不忍更釋手冒以檀袖相提携是時春風澹晴
晝桃花巖對雲窓低松紋泛硯一磨試嬰兒蘸眼
光玻璃紫霧沈沈溢總帳五輪指攬雙文犀此寶
塵中不多見銅臺玉壘曾箋題年來性癖摹石鼓
字身老硬沙錐齊屋煤瓦池染小袖葦管柿葉搜
荒蹊珍材乃能發神彩創規自欲摩天倪生平把
筆厭春蚓濃墨橫猾肥鴉棲一掃膠東三百紙欠
仲未覺花陰西有客打門索醉帖林梢驚破黃公
啼

十月十二日天寒欲雪用東坡寄猶子韻

太陰北來十萬里枯紅茅刀割古水書堂寧靜長
閉關零落空階積榼子綠檀覆牀正清眠透骨淒
寒忽吹起起看天色如淡墨風穴怒號貫兩耳玉
龍紛紛三百萬冥然白戰層霄裏天倉御米玻璃
珠將落未落心先喜小槽新壓羅浮春風景殘年
聊復爾生涯冷淡吾所愛肉食庸庸劇足耻金谷
繁華誰不知聚蚊一散何堪恃始知羅縵黑貂裘

不及重綿最溫美

冬夜贈別孫寶年表兄用東坡聽琴韻

閉關月餘生淨因懷人目斷青天雲梅屐茶胎正
間冷殘年冰雪歡逢君擬作平原十日醉蜀醪滿
浮銀葉尊親戚情話得喜悅圍爐家坐紅獅薰雄
心老寄鐵如意說劍龍雀光金紋留連未幾動歸
興離絃促拍驚忽聞傾觴翦燭各無奈玉繩絳斗

沈黃昏

雪詩效歐陽公禁體物字

朔風夜度龍山磧亂捲飛屑貯空碧錦雞催曉萬
花宮蒼菊無聲天下白眉端鬢角皆好春相逢相
盡道仙人紅茅岡頭指黃兔酥巖乳洞光粲粲
凝寒四合雲結縈盤盤花龍不見尾誰從蠶葉蟹
沙中直取金刀翦流水高樓催進綠雲盤胞炙羊
肥珀椀丹醉^眼下臨笑無地皓輝不熱紅麟鸞竟日
橫飛與斜舞超然臺下剡溪路年年歲歲老青山
重挑白戰慨今古

篠園兄徙居山莊寄贈二十韻

城區齷齪多鬱蒸面皮磨玉塵色凝晨清夜黑不
成寐毒蚊猛捷如花鷹飄爾長思雲水島菡萏香
中快濯澡秦洞桃源人事非燕川方口蹤跡湫吾
兄少年磊落人雲泉肌骨玉精神一朶蓮花不著
水塵埃何處沾其身常將白眼傲榮貴壁間挂幅
烟羅子方寸淡泊知何如空山無人花落水舊時
買得一片山日與白雲相往還塵塵念念盡消滅
惟有老鶴棲松關夕陽原上堆秋影蒟豸油油滿
涼景換酒時過黃花村囊雲獨上紅萸嶺眼中無
物空大千一卮一壑神安便世無定慧王摩詰昔
有孤高孟浩然二子風流宛然在江山况是長不
改吾兄有志託烟霞却使清聲落人海弟也自笑
神支離臨風相寄一篇詩方袍圓帽會真境何當
觴詠常追隨無端涼雨垂清晝紅鷗館外泉煎竇
會須共醉黃精杯莫教容易芙蓉瘦

莫愁曲

月明玉湖頭粉蝶花鳥睡細翠扶圍紅寒香解夜
醉銀繩直天河柳烟滿城曲不聽斑驢鳴嬌娥闌

雙綠斗帳依微紫蟬絛橫茵突金牡丹花滾風輕
絮鷺毛起欲說春心何所似

野歌二首

鴉鷓翠箭山柔弓仰天射落銜蘆鴻麻衣黑肥衝
北風帶酒日晚歌田中男兒刺刺心不窮老蛟喫
氣瞋碧翁獨笑披霜秋月柳條條葉葉黃濛濛
老茨如鏃金霜清烏犍騎出黃葉城雲凝血色天
欲腥腰間三尺寒冰明垂翅鳴呢空此生英雄不
識心非盲一杯送醉趙州土鬼燈抹漆山松青

夜來樂二首

太陰收氣光金精十里芙蓉裝錦城羲和敲日玻
璃聲劫仄飛盡今古平龍頭馮酒邀酒星纓纓如
拳不充罌楚腰衛鬢丑雨情粉霞紫綉藕絲纓三
點銅鼓擗犀箏翠盤舞罷檀塵輕銀雲櫛櫛瑤天
明戟門掌事報一更桂樓玉鳳聲嬌獐海綃紅文
香淺清黃鷺疊送千年航仙人燒樹珊瑚傾檻外
古桐青虎嘯歡心不覺為秋驚

許史世家年少郎眉稜刷翠頭金方七彩珠袍天

馬光錦奴搖搖刮星鐸夜氣切雲花麝揚狡狴嚼
火燈煌煌白膏鳳肺烘青糖中州鞞鞬朱絡筐牛
頭一尺檀霞漿芍藥妖姬羅繡堂香腴艷骨含幽
芳高樓唱月敲懸璫二十三絃驚紫鳳門外倒飛
交河霜赤霄在手華輝長軟玉油箋粘畫牆鐵鈎
作蔓題銀章橘心蘭眼生秋涼情如合竹有誰見
夢裏盧家紅海棠

仲春詞二首

燕染玄玉濕蜂露花房晚銅龍鬪水清翡翠含波
小石稜苔蝕菖蒲根柔雲弱雨驚蜀魂游絲縈春
春靡靡南湖沙白鴛鴦紫

東方日出香茸茸玉錢戲蝶翻軟風鸞帕抹烟春
夢濃夢中十二芙蓉峰一霎亂紅花濺淚滿院綠
陰柳刷翠可憐陽豔淨如掃王孫不來憶芳草

冰壺詩集卷三

歷城朱令昭次公

五言律詩一百二十九首

新竹和張榆村六首

虛壁苔絲潤飄蕭瘦影攢紫鞭浮水動青蠹掣空
寒期鳳何年過成龍有日看貞心能自許不負美
檀欒

慈菴復蕭森犀光閭玉陰琮瑋上清樂端直古人
心京洛名園舊瀟湘夜雨深天涯各風景對此發

長吟

膩香染枝幹
初日露華浮
豈是世塵境
疑來山水州
細青消毒熱
生翠逼高秋
為語穠桃李
妖妍態可羞

碧玉涼如洗
藍羅淨可憐
形神自超忽
毛髮亦清便
冰雪覘幽抱
江湖是舊緣
窓中讀周易
風細葛巾偏

不具炎涼眼
相看意轉親
清冷初照屋
峭拔已過人
霄漢須同志
泥塗肯陷身
塵君無伴侶
長此德為鄰

不是西江種
梁池此舊栽
看皮驚虎豹
數筍得嬰孩
中散琴盈耳
宜城酒滿杯
臨風坐瀟洒
有待故人來

公子二首

沙軟官槐路
春酥細雨餘
門前金絡馬
天上玉堂書
烟月隨歌扇
鶯花引醉輿
東風寒策策
織翠進華裾

桐竹玲瓏影
紅輪上碧欄
園林思謝傅
賓客幾馮

驪為藥調銀鼎檳榔貯錦盤誰家同貴麗青歲好
追歡

試茶

泉水汲丁東煎盛兔褐紅香濃雪芽細色嫩乳花
融最愛玉川子因懷桑苧翁當風倚松枕高趣復
誰同

暮春集紅鷗館遲張榆村不至

雲細晴光淡樓陰徧紫苔榻因徐穉掃徑待蔣生
開蛺蝶充花客茶蘼作酒材芳菲能賞鑿為置淺
深盃

過綠玉堂四首

風靜簾衣捲高人卧紫霞清才真獨步厚福更誰
家酒醉中黃子梅迎萼綠華道根應不淺世事看
如秋

書堂名綠玉曲折徧芳春疑故桃源棹相逢錦里
人白盆蘭葉短紅壤藥苗新更有談經約無嫌過
訪類

排窻青嶂屹院落似山家握手傾心骨從人弄角

牙名言聞樂廣高乘勝田巴索句琅汗裏風彈皂
帽斜

雨過葭牆潤菘苔石氣連泥香春種藕花落晚啼
鷓絳帕攤書坐烏友閣肘眠何因塵世上得見小
彌天

題友人齋壁

坐久文章靜心疑宋玉家碧香臨水竹紅影上牆
花細雨歸江燕微風候建茶蕭齋無熱客爽氣滿
涼秋

香磨

驚箭雙流下明波百丈開銀龍噓艷雪銅鼓激情
雷地軸時輪轉天香晝下來慎無摧伐盡恐有棟
梁材

村行

四面黃雲擁籬門對曲塘縹車寒女掉網架野翁
張天棘綠纏屋石榴紅出牆壩頭壓桑落留醉尾
盞香

鵲華橋晚眺

停策枕椰杖微涼白衿生一湖秋水濶幾箇釣舟
橫沙澗荻花亂石橋魚影清言歸不歸去鴉陣夕
陽明

賦得疎雨滴梧桐

何處風吹雨丁東落翠梧孤燈照殘醉短髮茁霜
顛坐共夜聲久病因秋氣蘇來朝登水閣客思滿
寒蕪

促織

深宵弄清響南楚舊王孫自煖霜中砌相親月下
門暗泉流石罅殘葉積莎根紅淚誰家客無眠悵
別魂

題店壁二首

暮投前店宿寒景嘆荒蕪浸水籬門倒吟風樹葉
枯老奴鋪紫薦疲馬齧黃芻思緒那堪話霜洲野
鴈呼

淺酌聊乘興清酣却憶家小詩孤壁上大草數行
斜心驚難成寐燈寒不結花推窓看夜色星月滿
天涯

宿腰站

遊蹤曾過此小別已三春茅店更新主綈袍感故人夜聲霜柝急旅味尾危醇好夢因風去高堂慰老親

山居

識得雲林趣塵情未許同手持雀頭杖言訪鹿皮翁一牧乳羊白數株寒棗紅徘徊石巖畔樵笛起西風

夜坐

蒨棚亂蟲語紙窓人未眠疎松侵夜幌冷月逼秋蟪蛄白吟如鶴燈深坐似年驚風響荷葉滿意小江天

金錢花

圓薄無稜郭秋紅箇箇明料應難使鬼不必強呼兄露重攤還濕宵分隨有聲牡丹誇富貴竊恐是虛名

雨夜偶感二首

擁被雙眸炯燈青草閣寒泉風鳴夜壘竹雨泣秋

竿人去隨珠隕愁來蜀道難
楞伽曾細讀未覺愛
河乾

雨落若不歇蕭蕭黃葉林
洒成一秋淚冷盡十年
心零落杯中物悽哀隴上吟
空惟有無夢情緒感
時深

即事

水館消殘暑生衣換細羅
兼旬形氣斂近日醉吟
多斜白飛涼雨疎紅墮
晚荷流光變高素清籟
林柯

吳船書屋看秋海棠二首

酸艷西風裏泠泠玉露華
綠寒三徑雨紅淡一林
霞照水清無滓宜人冷
不邪豪家未知重開傍
讀書家

霽景澄心目幽叢抑復揚
微烘獮髓赤輕點麝香
黃散影莓苔地吹芬薜荔
牆殷勤謝寒蝶相伴坐
秋光

連雨二首

淫霖胡不止天道信無常
自覺紅鮮貴空思玉練

香虛廳稀過客極浦有鳴榔淒寂終何事圖書閱
一箱

陰官莽奔駿一氣暗空濛孤鼠無完蜜蛟龍失故
宮歌風渾浩落槌鼓尚沈雄如鏡平池水何當照
碧翁

聞砧

十月清霜曉人家尚擣衣紅閨聞杵動青海望人
歸古堞寒烟上荒沙野鴈飛况當搖落後懷遠更
依依

山行

落葉迷行跡尋緣放赤藤寒林棲野鵲晴日曝山
僧澗影紅泉脚嵐氛翠石稜不須嘲飯顆太瘦已
難勝

雪晴訪友過鵲華橋書所見

雲散紅輪湧城陰雪一坡沙腰斜禿柳石齒斷枯
蘿茅厚人編屋冰堅馬度河犯寒尋瘦李唱和蕊
珠歌

山寺小憩

蜿蜒盤細路石蘚綠斑斑鳥下竹廊靜水流蘿洞
間寒雲棲古塔返照射秋山自笑黃塵客留連不
忍還

郊居

紅槿映疎籬人家插酒旗雞豚田祖廟鷹犬獵神
祠小市蒸為粉朝餐豆釀糜幽居吾自得不遣俗
人知

山行二首

漫策烏藤杖崎嶇徑不平秋霜催綠橘晚雨落紅
檉雲淨心期遠山深眼界清拂衣時小憩寒鳥自
呼名

蘭若西峰頂秋光亦可欣鶴行松徑雨僧倚石欄
雲葉隨千聲亂泉流一脈分歸來天欲暝鐘磬下
方聞

幽居二首

偶展蒲茵坐涼鴻叫遠天古苔封石徑熟果落山
泉紅葉秋齋雨青蘿晚洞烟幽居好風景野客共

周旋

村靜柴門老悠悠水岸斜挈壺來酒肆放艇到漁
家夜月紅柑樹秋風紫桂花涼天足清興高詠野
情賒

夜坐

散髮當軒坐浩然天地秋風高聞木落夜久見星
流急杵鳴村院巖更報戍樓涼思添幾許新月曲
如鉤

山寺

元景散晴光樞衣到上方烏啼黃葉樹僧定白雲
牀雙澗鳴秋水千峰挂夕陽暮歸鐘磬發天色遠
蒼蒼

張榆村見訪話舊三首

古人重意氣終始似陵阿管鮑不能見尹班今若
何黃金借顏色白屋詫經過轉瞬秋風起淒寒逼
蔓蘿

紛紛梳蠟鞭無足訂忘年接劍真如此彈冠益湫
然豈能為禍福渾不識憎憐但得心如水何須酒
似泉

只好言萍梗那堪共井廬昏狂難理遣輕脫易情
疎無事且耽飲絕交還著書海天落明月一笑總
浮虛

挹青樓偶興

高樓拱真隱朗玉比心顏冷語烟中鳥晨光雪後
山飽諸塵世味懶置齒牙間詩酒平生舊能消日
月閒

友人夜話

說到繁華相當杯怯乳鸞梁園飛鳥亂金谷聚爇
多藥笥留禪味櫻桃續古歌團團諱輕別松外月
臨波

尋秋

涼風吹筍帽策杖過湖塘水竹晚枝瘦石楠秋葉
香黃鴉千點亂白鴈一繩長短屋斜陽裏人家喚
賣漿

早秋村居

何處西風起吹涼到華門牛羊山下屋菱苕水邊
村林叟枕榔杖田兒蟋蟀盆幽棲有深味要與達

人論

雨夜

高齋共清宴風起燭光流
燕咽綠莎雨夜涼黃葉
秋寒醪浮蟬脚漆管試魚油
因話巴山事西窓夢
可留

興國寺

一片登臨意清襟謁四禪
鐘聲上方寂塔影碧峰
懸寶樹飛香雨金沙咽細泉
頓令塵念息仙梵覺
冷然

食單

初冬食物頗有美者感會所及輒寓於詩
燈下脫稿得十六首庸補食經未備爾豈
遂如鄒平公所為耶

醉蟹

其美在巨
餘無足取

瓶盞新風味江湖舊暴豪
北人工醞釀南製壓糖
糟解甲玄黃血然臍玳瑁膏
長卿無缺事但苦嚼
空齋

雉羹

尚想杼弓處，俄看入饌時。
鷄猶斂，香翠鷺或逗瓊。
絲斑駁，錢鏗鼎，虛無陳寶祠。
紅蓮江米熟，配食正新炊。

兔餅與雞脯魚肩
合製最美

野曠慘風烟，飢鷹奮老拳。
無由挾姦狡，快得薦芳鮮。
玉麪乃霜色，銀盤似月圓。
雞豚甘附黨，遺恨滿西川。

西川

黃雀北風發則過
癡而易襲

冬近深愁雪，巢空何處家。
雲羅終日待，霜鶻不時穿。
爭粟戕軀體，披綿漬齒牙。
傷哉零落羽，冒冷集黃花。

河洛菽粉為之
澆以羊汁

憶自唐天寶，名傳熱洛河。
血煎蒼鹿少，脂疊乳羊多。
菽麥疑甜雪，櫻桃想饅饌。
分餐氣暄煖，朝日凜霜柯。

餛飩裹蟹肉
最佳

綺綉從心細，雲兜轉手成。
蟹肥黃染箸，蕪短碧浮鐺。
一一含風薄，汪汪注硯清。
因思韋僕射，無限朶

頤情

野鴨

盡道家雞好能高野鷺無稍聞人語細差覺羽毛
粗夥聚風低草聯飛月動湖竹弓應射得曉市問
漁夫

冰魚

曉市濛濛雪藤枝挂幾層一絲通脊翠半尺等身
冰玉筋凝同色銀刀凍有稜黃魚豈不美多賣得
人憎

桃脯製法得之
王公舒

爐紅煎水蜜紗碧障風埃細膩龍根脯光明虎魄
胎人疑非北產法好自南來一片甘喉吻磁罌莫
屢開

灌藕

秋挑泥壓擔夜煮火埋盆新沫湯池滑橫陳玉體
溫蒸霜黏却化紈米瑩無痕雪向牙盤裏柔絲亂
幾根

潑菜

安肅種傳將軍科細捲黃鹽花洒雪片椒實結冰
湯吳隱終清操桓侯亦冷腸朱門供菜把狼藉只
堪傷

芹

鋤土下芹子菊然烟圃中方稜舒細葉直節聳高
叢小井青泥雨芳洲錦帶風冬初正堪剪兒輩好
提籠

山楂

聞道滁陽果繁紅秋後低鶩飛滿林雀爛用一丸
沉女艷酣榴酒儒酸徹瓠犀消中知最好無乃笑
羹藜

柿

赤葉風驚晚烏裊日溢秋砒明勾漏近天凍蜜房
稠山客論箱送州人壓餅收茂陵如見啖無核更
何留

芋

病起一藤隨親看劬土芝形如黃鵠卵色似紫駝
尾盤谷空仙筆臨印幾富兒深煨寒夜火門掩雪

風吹

蕙苾

平斗量來易那知品格高
穿珠消妄念進粥得淳
熬但使身常健何妨謗屢遭
夜長詩律細蠟淚滴
葡萄

溪館冬日

香煖磁龜火圖書擁數重
門前惟斷柳屋後自深
松鄰下人初至雲安酒正濃
清談日將暮西寺一
聲鐘

重結詩社

高館論風雅惟應數子親
虛過菊開日旋及鴈回
春俛仰身仍健賡酬跡未陳
相期來不速雪徑履
痕新

盆中假山

日出盆山曉蒼然黛色濃
仇池感子仞華岳小三
峰羅帶潑洄水菖蒲細軟茸
却看幽絕處似有別
仙蹤

贈孫寶年表兄

不踐黃塵境孤高道自尊
課兒書滿架愛客酒盈樽
花擔來門外漁船繫柳根
幽居遺世味漠漠水雲村

春夜留別孫子師外甥

鶴篆繞輕烟鳧樽泛別筵
張燈高館夜聽雨暮春
天縱酒吾先醉論文爾獨賢
分襟在明日幽緒託長箋

清明日野飲

步逐籃輿穩相將到野田
莎平盤馬路火冷賣餠
天從席圍花豎清歌送酒船
醉驚啼鳥亂樹樹夕陽烟

蘭

名花滯空谷迴與世相違
一萼淡含雪半春香襲
衣蕭茅生徑滿燕雀過度
稀細把楚騷讀朝光涵
翠微

自南山林泉觀移來枸杞一株

枸杞陽崖裏長鏡破錦紋
多年依桂觀此日別茅
君根老成黃耳山深吠白雲
無端涉塵世紅子亦

紛紛

登水明樓看雨

恍惚倚蘭臺，雄風實快哉。
油油雲乍合，颯颯雨紛來。
藕葉跳珠亂，松林潑翠開。
故人千里駕，並為洗塵埃。

退居二首

不犯紅塵色，城西只退居。
涼風清豆圃，猛雨鬧瓜廬。
戴笠自行水，枕鋤時看書。
問門誰見訪，垂柳綠扶疎。

間行亂泉裏，一徑綠濺濺。
植杖量花長，除蟲得果全。
小杯斟野月，長笛繞林烟。
此樂堪誰共，窮交孟浩然。

謂取柳村

小園

日日小園內，二三人共遊。
那堪風送雨，不覺夏成秋。
秋水自石根，曲杯兼花片。
流此中有佳句，留待錦囊收。

對月

遥峰初吐月，秋漢洗雲烟。
輪到三更滿，光看萬里

懸金虬動蒼海白鳳過青天安得乘風去清虛玉
殿前

西園雜興二首

何必悲搖落園居樂事長更看開茉莉一冷變楓
香客送秋茶到兒燒晚筍嘗小樓傳笛坐烟水共
蒼蒼

茅屋隔人境蕭然陶令家花鶯浮水淨錦蝶過牆
斜密茁憐罌粟重生喜木瓜木瓜久枯年來渾却
掃隨意讀南華

秋夜

擁鼻孤吟久秋殘小閣空哀音南去鴈寒信北來
風紅檠開燈暈金花糝桂叢更誰陪夜半同坐雨
聲中

雞冠花

傳來吳蜀種驚艷得頻看闕向秋風院栖宜夜雨
欄自甘垂錦翼誰為整霞冠別有興亡恨陳家玉
樹殘

蟹

暫釋長蒲縛還蒸小甌香奴整高挺雪癡殷重含
黃甚喜三秋賣何曾一飯忘平生耽俊味關鬪冷
無妨

病桂作花賦詩索和

病桂久蒿沒牆隅誰見尋堪悲垂朽質不死向榮
心勁影疎含翠貞香細注金相逢小山客端為發
長吟

晨起就日南窓

日出窓扉啓霜光尚滿臺子崩榴自綴柔飽菊將
開林鵲占晴過園蜂就暖來靜中觀物理吟咏豈
徒哉

秋日閒居二首

屏跡居幽巷頻年寡所聞經傳得兒子官責任即
君細菊開涼雨深松洩美雲了無塵俗累薄薄酒
方醺

架堆書萬卷門設晝常關未必人皆醉深知我獨
頑石孤思錦水松老別黃山久識浮生寄何須學
駐顏

登臺

更不攜尊酒
莎臺每獨登
畦香殘雨菜浦影夕陽
冒紅寺遠猶見山深幾層平生得秋助詩興倍新
新增

水明樓小集

時臨八月末樓到上層寒度水雲全白迎霜樹漸
丹投壺便小袖橫笛傍危欄醉醒從君意新來酒
令寬

西園晚秋

荒涼隔塵市客不到深居檻憩輕輕蝶池遊細細
魚秋聲發高樹霜色凜寒蔬漸可教兒輩埋盆護
錦蕖

雨夕懷劉此亭

江海故人心知惟此亭與君頭共白於世眼誰
青支病須高枕澆愁合短瓶蕭蕭鶴柴雨恨不對
淋聽

過水潮寺

古殿飄黃葉前朝寺有名石房遊客少竹露滴僧

清林席傳秋講壇燈避月明
六塵真欲洗沙水迸
涼聲

種莎書屋前看種百合

百合輕籠致西峭道路多相從
依客土不忘別陽
坡分瓣埋珠麝開花感綺羅
秋深過阮宅定許劬
霜莎

瓶中杏花

膩條穠艷蕊瓶影幾枝新
水浸帝青古粉沾仙袂
勻幙香風起夜窻小月移
春一種胭脂面惟應來
玉鄰

春日偶題

天氣融晴景簾閒晝刻長
春來人不覺夢斷酒餘
香柳欲窺清閣菱看織曲塘
野鷺方出谷滿意弄
新簧

春雨

入夜猶聞雪凌晨暫啓扉
條風剛拂面絲雨忽沾
衣園葢爭枝靚溪橋報水肥
未愁泥濘阻過客向
來稀

春夜對月

柳際微茫月神傷憶往年玉人臨綺席瓊管和水
絃今夕空度裏清光寒食前子規鳴不歇坐盡博
山烟

西園老柳雙鵲來巢

雙鵲欣搖尾南來自近郊舊時吾種柳高處爾安
巢求友鳴晴墅將雛集露梢甚聞稱瑞異終愧託
衡茅

幽居二首

亦知無客到聊復啓晨扉刺水新袂長捎花孤蝶
飛書聲隔林竹荷氣上絺衣百畝欣常稔無嗟生
事微

晚霽躡輕屐溪遙隨落花夕陽低草閣烟水帶漁
家深樹鴉雛長輕風燕子斜田園有真樂莫向市
朝誇

初秋

一葉銀牀下商飈動容情長烟拖暮色遠樹有邊
聲叢蓼燕支冷澄湖翡翠明新涼愜幽素肌骨與

秋清

山行二首

策杖烟嵐裏風微薄靄流青天一行鴈黃葉四山
秋雲影冒僧塔梵音清佛樓冷然豁襟抱不羨武
陵遊

雨過天如沐方袍小袖單烏驪盤磴穩蒼鼠竄松
寒秋境隨緣會閒身到處安何當讀書屋移住碧
巒玩

感秋

天時不常燠草木已驚秋公子猶牽犬窮儒合飯
牛螢光荒塹冷松火夜堂幽何處清商發泠泠水
盡頭

病中劉此亭過訪

葉墮鏗金響泉流漱玉聲竭來秋物色無奈病心
情雨院叢花盡風巢獨鳥驚慙慙感君意寂寂嘆
吾生

病起野鶴樓喜王公舒至

病起憑闌處樓陰日脚斜蟬聲墮殘葉水勢落平

沙地僻君難到年豐酒易賒聊堪具雞黍休笑老
農家

新釀

糟牀昨夜雨酒熟晚秋天舊壓桐君麴新分柳毅
泉鸕鷀珠滴瀝鸚鵡玉便娟一醉林亭夕朗吟黃

葉前

雪和柳村二首

開門不見地藥竈碧烟流破曉能通屐凌寒共倚
樓聲稀梅夢悄光冷竹魂幽信矣王郎美新披鶴
氅裘

稍蹴迴風急紛飄近水斜醉眸橫玉案詩鬢點冰
花清淨仙界風流學士家撲窓還簌簌白戰手
類義

送春

簾罅晴光淺忽忽一片春永懷今送汝芳草亦憐
人院外黃筍滑林間碧玉新無端南浦恨獨向落
花辰

華不注

單椒看直上爽氣豁心顏戰伐從終古乾坤有此
山高雲摩翠蓋明月挂金環便欲騎龍去瓊樓十
二間

過張山人莊

振策間相訪何堪倒屣迎侍兒燒藥氣孫子讀書
聲紫錦莓苔地紅珠枸杞棚因君蕭散意吾亦愛
歸耕

賦得午醉醒來晚

別館誰通屐持杯獨看花玉山真欲倒烏帽不知
斜落葉喧高枕殘陽舞亂鴉如何消內熱一盞雪
坑茶

黃葉村訪鍾恬瞻

風流鍾晦叔結屋在巖幽茗椀留終日山蟬響暮
秋滿園紅石竹當路碧牽牛別去何妨晚前林月
一鉤

靈泉寺次公舒韻二首

一勺靈泉水仙源未可尋青山樵路細黃葉寺門
深谷暗傳虛籟秋高動朗吟探奇無險阻小憩亂

松陰

山門高翠上初地得相尋
咒水月壇靜然燈秋殿
深風塵悲短夢猿鳥和長吟
投宿朗公舍蕭蕭蘿
薜陰

後溪

一派連山抱潺湲十里餘
笛吹蘆絮亂船繫柳根
虛沙淺露寒蟹水清遊
細魚灘頭小蝸舍應是釣
人居

曉起步至後溪再賦

一雨晴仍快溪光想漢陂
連筒村汲早孤碓野舂
遲兩岸紅楓葉中流白鷺
絲濯纓兼沐髮於我總
相宜

山居次荅公舒

此地無塵色君懷恣寂寥
山田接鴉翅澗草沒牛
腰挑菜女臨水攜琴僧
過橋寧須愁一醉鄰肆酒
旗招

白菊

送酒無人到開花絕世香
故應饒此白何必減於

黃暮色銀塘水秋魂明月廊休將插烏帽恐惹鬢
邊霜

紅鷗館小集

肺病蘇秋氣年光嘆水聲自須陪客話終不敗詩
盟駐展孤花艷迎人細竹清言歸復携手新月板
橋行

重陽前三日集秋聲館

懸知晴可卜清興不教孤了髻直開甕團臍蟹佐
廚風池微皺白霜葉重施朱幾日登高會還來插
菊無

對菊

抱膝經窻坐幽花不世情池頭寒玉濕籬落淡金
明影向霜中瘦香於月下清紅磁折雙朶長奉古
先生

秋夜即事

談振霏霏屑歌翻昔昔鹽燈青槐色古杯白月痕
織病蠅秋拳壁盲蛻夜觸簾莫嫌聞見惡險語得
新添

梨

山陽有美梨霜樹冷淒淒黃暈金千顆香苞水一
提市橋人買夥橘柚價羞低好備三更渴烏籃手

自攜



冰壺詩集卷四

歷城朱全昭次公



五言律詩一百三十二首

冬日雜興十首

余本儒家子心懷燕趙風
垂竿空歲月種菜老英雄
興寄雲山外身閒杖屨中
長安金絡馬隨盡軟塵紅

寄跡饒荒冷庭除半水莎
無人堪倒屣有雀不張羅
禮佛塵根淨吟詩口業多
隨緣且恬退世法看

如何

海運黃宮後研朱勘寶經細金花瑣瑣哀玉水冷
冷侵曉田霜白經秋野菜青間門來客少向暖坐
松庭

曲谷通斜景凝寒夕轉加林烟上樵屋塘水凍漁
槎雪店三家酒山房十月花羊裘天下士誰解辨
龍蛇

行過邯鄲路籃輿不入城劫深閭道晚金散舉家
清輕脫由天謫疏慵是性成閉門搖落後風水亂
寒聲

挂眼無塵事謀身有樂方人情自淳古吾醉入漠
茫小樹紅柑月平田綠芋霜十年雲海性老鶴一
聲長

日月飛連弩催人又孟冬帳無燕玉煖壺有蜀酥
醲居家非干象談言不露鋒置身隨地好那便一
生慵

清旦聞雞起高寥獨倚欄風罔榛子落霜寺石門
寒水涌三花樹樓參百尺竿留連翠微影坐到夕

陽殘

烟火城南麓雲扉處士家
採芝間意思煮芋淡生涯
漢帝留桃核齊侯問棗花
自知仙骨少修拙卧
蒼霞

午院啼寒鳥高齋不世情
案頭如意妓竹外接羅
清山水名流跡風騷大雅盟
常懷私淑意時勢不
同聲

冬至前一日也堂茶話

疎松蔭雪沉古屋野泉西
舊雨人同坐浮雲事不
齊茶香溫白土梅韻冷紅屏
明日東臯路陽雲一
綫迷

看梅

幽修一兩枝開及孟陽時
月豔明黃卷風香縞綠
漪斜宜侵曲徑淡欲隱疎籬
不作燕支面高情獨
我知

與耿柳村夜話因贈

君到城南住交情十載中
但聞謀得拙未見送將
窮榻為徐孺下詩愁秦系
攻夜長共清坐蠟淚一

堆紅

賀老夜歸因贈二首

剝啄初更後，秋堂清宴俱。
夜光紅蠟燭，老影白鬚鬚。
有興惟歌笑，無能是詔諛。
百年身健在，富貴更何須。

眼底論交道，君誠不負予。
三千人盡散，二十載同居。
就枕廬生比，乘船賀監如。
贈詩成一笑，可勝爛黃魚。

遺興

紅翠新花草，深幽舊屋廬。
得朋因自樂，與世未全疎。
金錯囊垂整，綾紋刺有餘。
謀身不妨拙，旦夕一牀書。

早春登千佛山四首

一杖青冥際，行穿紫翠重。
寺花春已折，巖樹雪猶封。
爆竹翻驚鳥，空潭動蛰龍。
曩遊記秋霽，看月上東峯。

春至風多惡，今朝天宇澄。
社中逢慧遠，嶺半憶孫登。
為樂寧非福，除詩百不能。
芒屨甚輕捷，直似打

包僧

禪居最佳處布席及清長自啜小團月旁看中聖
人石房挂琴冷冰谷出鶯新滌盡浮生事胸中無
一塵

世事憂勞久爭知物外閒緩尋殘燒路小支夕陽
山兩寺鐘相答千松鶴獨還惟應一尊酒攜客屢
追攀

雨中春望

遠岫沈雲氣危樓散雨香鶯飛溪水碧人語菜花
黃歌罷雙垂手詩成一舉觴春情待來日又為踏
青忙

嵩山

磴道盤空上噌吰報午鐘花明幾層殿雲黑一山
松下馬塵機息聞鶯旅思濃回頭六十里不見鵲
華峯

晚投陰陵關

數里人烟斷關門石路長披星孤客冷弔月一陵
荒鬼物吟山殿松杉隱驛牆辭家事奔走到此倍

神傷

南陽晚泊

萬頃鷗波淨千條纜收北風天作冷南浦客生愁
愁春月朦朧柳湖燈遠近舟漁簫聲可聽無奈此
淹留

桃源縣

風力狂飄絮南來氣候暄孤舟繫桑本小縣指桃
源河鯉揚馨上沙鷗洗翅翻客懷何處寄一夜水
潺湲

晚過天妃閣直抵淮關

突兀天妃壘黃流此下經挽舟委人力轉軸信坤
靈閭水傾三峽檣燈動列星全淮形勝地更欲問
三亭

病中過高郵

連日春寒甚裘茸煖病夫黃淮一夜過風雨片帆
孤不見孫莘老空經甌社湖秦郵木瓜酒興嬾未
曾沽

揚州懷古

共說江都好春裝
更少留江山
邀一醉烟月恨千
秋瓊樹無遺種
雷塘有舊樓
成紆竹西路
歌吹不曾休

天晴過江

夜聽瓜洲雨
朝為楚客吟
半帆初日上
一片大江深
壁壘崢嶸氣
英雄割剝心
金焦真媚嫵
弭棹欲登臨

江亭次韻

長懷此焉寄
江上坐孤亭
叢葦散沙水
幽禽啄草汀
林橫亂烟白
塔聳一峯青
流眺情何極
漁歌遠

虎丘

銀榜山門古
蒼苔石路斜
暗泉通小殿
危石帶疎花
扶彈韓公子
傾城陰麗華
年年二三月
遊客更思家

閶門

日出閶門啓
人蹤劇不稀
玫瑰論擔賤
盧橘上橋肥
細雨紅釘履
涼風白芡衣
南濠新小部
欣賞欲

志歸

看刈麥

麥熟家家喜田頭擊壤聲
白揮鎌雪亂黃截壠雲
平野雀隨車去村童拾穗爭
故鄉遥想像曠過幾
場晴

臨城驛

鞍馬相催迫風塵不憚勞
沉乾新路出水落舊沙
高屋角堆芳杏槐陰賣冷淘
入門詩滿壁一笑挂
囊刀

鄒縣道中

古邑亂山邊山雲斷復連
疎籬酸棗矮小井石榴
鮮客倦長途馬風清遠樹
蟬前坡綠陰美小憩袒
雙肩

追涼至南溪

巾服涼如洗橫塘野步歸
隨風波駘蕩撲面雨霏
微無數綠荷裏一雙紅練
飛來朝置尊酒相賞莫
相違

廢園

漫欲追名勝，逶迤過巷西。
青苔荒院合，白日怪禽啼。
倚石休回屐，聽泉且杖藜。
豪華渾是夢，不朽謝公題。

調賀老

貧賤身徒在，縱橫術本無。
栖栖苦彈鋏，一一怕吹竽。
酒美粧紅頰，池清寫白鬚。
追陪年半百，舍此更何圖。

寫意

三十三年事茫茫，費轉頭癡情真。
欲絕笑疾未能瘳，市井門愁入漁樵。
客喜留泥蟠，雖迴別無責得清修。

摘菡豆

蛾眉顰水曲，羊角挂牆隈。
園放輕籠入，童隨小摘來。
拂衣香瑟瑟，印手翠枚枚。
配食宜何物，凝脂粥細煨。

西園雜咏四首

盡日籬門掩，悄悄細雨零。
畦邊遮土銼，井上補茅亭。
泥露薤根白，水披芹葉青。
無能學老圃，有興倒

長瓶

無事門不出鄰園時一觀霜苔供縛帚修竹擬垂
竿極浦雲沙淨危樓節氣寒當年賓客地臨眺有
餘歡

深巷秋將暮幽園到幾回山丹如百合楮實學楊
梅溪靜鳥雙下日斜尊獨開南遊舊朋好底事不
歸來

無眠因早起蟋蟀尚依牀開戶未出日添衣初降
霜子乾收黑丑葉落掃青棠朝食何須肉惟聞豆
粥香

秋望

清睡忽驚覺風開黃葉門支筇一長望鳥沒夕陽
村曲岸連橋影高沙蕩水痕秋懷正寥廓清磬報
黃昏

懷人

弦上難留箭刀頭自有鏢江東未歸客迴隔暮雲問病
間病久詩囊溼秋高畫扇閒可能看霜葉同上玉

函山

枕上作

空堂睡難著推戶視天光野露荒荒白秋河耿耿
長興因新病減情為故人傷已近登高節黃花艷
我旁

牧兒生日二首

今日兒生日匆匆十二秋依然湯餅客同集水明
世事風雲變人心壁壘稠所欣看女長身外更何
何憂

牛角紅繩繫金錢挂在胸書寬今日課衣窄去年
縫蕾發低低菊鱗生小小松較吾為善飲琥珀注
杯濃

重陽前一日雨

明朝是重九獨自倚樓間颯颯風迴水昏昏雨壓
山光陰嗟棄置筋力任疎頑欲放題餽筆丹黃萬
木間

重陽三首

不逐龍山會窺園杖一枝地猶沾雨濕天故放晴
遲翡翠寒偏媚芙蓉晚自披誰家奏絃管似我在

東籬

采菊新霜滿，嘗饅舊俗同。
登樓窮眼力，側帽護頭
風水劃縱橫，白林延遠近。
紅佳時須盡，醉倒載學
山翁。

莽莽雲低樹，嗷嗷鴈落灣。
重陽今日過，孤客幾時
還。嫩橘杯空對，寒蕪院久闌。
遙知懷舊淚，應亦洒
吳山。

秋夜二首

肺病撓清睡，繙書却更停。
堂坳喧夜水，簷隙隱秋
星。惜別塵蒙榻，澆愁酒坼瓶。
南征幾聲鴈，故故逼
人聽。

數報嚴城鼓，虛廳未掩扉。
芙蓉知自斂，螢火欲誰
依。著物秋清切，侵人月細微。
鄰房夏刀尺，何處寄
寒衣。

放書眉

放書眉

聰明畫眉烏鸚鵡，共聯班口舌。
能緘默，樊籠得放
還。覓儔非故土，寄食有深山。
鷺隼秋來擊，休巢木。

秋問

過石門有感

百草園南畔，閒行送夕曛。
麒麟空壟路，霹靂碎碑文。
漸已犁鋤沒，從教芻牧紛。
猶餘不平氣，鬼唱雨中聞。

聞蟋蟀入室有感

虛室草蟲入夢回，霜月斜繞牀。
偏細語動我，亦長嗟。
江上幾年別人，今何處家凝思。
復傾聽短鬢，恐將華

秋柳

一片傷心影，聊蕭可奈何。
霜餘衰葉盡，風處斷絲多。
波綠仍如鴨，醅黃自比鶯。
春初同賞客，幾箇復來過。

盆中楓樹

漢殿曾多種，寒紅特地稠。
在盆能具體，對客遣悲秋。
直似江帆舉，親從嶺路遊。
不堪小搖落，風力漫颼颼。

猿

微物闌何事千山萬里求作場人覓食變態汝為
優心共巴雲遠啼兼峽雨愁故羣寧不念歸計尚
悠悠

老馬

龍種今衰邁長嘶自不平草從華廐長塵向玉鞍
生身老遭人棄山深解夜行尚聞村父老汗馬說
南征

鴈

陽鳥多辛苦年年萬里程賓秋牽塞意唳曉挾江
聲暖草藏機滿重雲失侶驚帛書能寄否人在闔
閭城

貓

靈性來西土後貌白玉光朝俚初日暖夜擁故衾
香此日知潛藻無牙嚇墮梁威行不在怒好為守
書堂

懷史何二子

人去樓空鎖蟲絲舊榻懸梧桐蕭颯雨鴻鴈次寥
天憑夢過江渚將書託估船何時見雙至把袖喜

應顛

晚秋野望

漸覺憑欄冷秋深感歲華壠禽銜滯穗園屋絡乾
花釣去一絲水樵歸幾束霞但聞林外響砧杵兩
三家

贈四兄

自是貧非病惟須醉不醒妻孥偕困頓風雪與飄
零米盡瓶翻鼠茅踈屋漏星衰遲伴猿鶴未用詣
山靈

見高南村畫菊

觀圖忽回首遠憶高南村勲伐名心息丹青老輩
存寒花非女艷怪石儼龍蹲無分涉膠海空然傷
別魂

冬日溪館

小隱誅茅處荒林隔幾重晚烟青漠漠寒水白溶
溶世事如雲薄交情讓酒濃相期深雪裏來看後
凋松

梅花四首

把杯酬冷韻露粉濕黃茨流水香飄榮寒山雪壓
枝羅浮驚舊夢玄墓憶當時更擬詩中畫漁家短
短籬

一片清空影長烟碧玉飄風姿真欲絕塵色已全
消買酒江鄉晚騎驢雪寺遙寒颺鎮幽寂脉脉送
芳標

倚杖探孤冷縈紆蕝徑通夜華明樹底春意釀苞
中笛弄青羌月箋題紫陌風洒然清瘦態好伴鹿
皮翁

十畝桃柳院晨霞變素陰枝枝青粉骨朵朵白檀
心蘇晉經窻冷盧仝茗閣深北風揚縞袂未覺野
寒侵

春夜樓上

梁燕語中夜愁深來鬱陶月知侵綺扇人與別江
臯淡影交春竹微香笑野桃暫時思把筆恐亦減
風騷

西園小集

小山盤細路鄰杏看還真得酒無餘事論心更幾

人綠池微縵雨黃鳥細啼春明日過寒食空驚烟
火新

雨中次韻

十日風吹雨當春戶半高梨殘承履白芹短拔泥
青暝色樓孤倚江聲客共聽張園釣魚會馬滑暫
須停

幽居

誰識幽居味中邊似蜜甜句因行緩得香及睡餘
添聞雀翻情樹飛蟲聚午簷山於春更好雲外數
青尖

暮春月夜有懷

今夕度南月清輝捲碧紗三杯戀春色幾日隔天
涯翳翳花如霧朦朦柳宿鴉醉餘思一曲誰為奏
琵琶

立夏

才見春歸去驕陽勢欲炎練裾猶未試彩筆且須
拈石眼迷花萼籬腰出筍尖傾杯賞新夏衣袖酒
痕淹

觀瀾亭三首

放眼蒼茫裏，憑欄勢可驚。
穴封神鬼秘，濤撼古今聲。
暖燕銀沙泊，晴花翠島明。
慙非木華筆，詎易測深清。

詰曲靈源路，林香地轉幽。
鷗波動碧藻，鯨沫濺朱樓。
夢寐從三島，風烟漫十洲。
惟應漱甘冷，旦夕此淹留。

好事攜官醞，留歡解帶圍。
文章高會在，棟宇昔人非。
樹以樊能老，碑因榻漸肥。
相將看飛瀑，夕照滿苔磯。

高節山房賞瑞香花

得種自商舶，長成南海香。
花開足詩思，客到敬書堂。
梅落少零粉，柳遲纔欲黃。
聽翻紫雲曲，濃染浸瑤觴。

秋日偶集

避地經年久，空庭宿莽長。
交新從簡畧，詩細入微茫。
把酒淹秋興，披衣坐夕涼。
偶然成宴會，露菊滿筵香。

蘋婆

林檎曾許接本草竟忘收市果從燕產江萍向楚
流香須傳十步紅每及三秋枕畔冰盤裏懷人一
夜愁

石榴

結實當簷戶離離數十枚笑風將齧齒羞日並殷
腮斗帳深教挂雕盤滿與堆惟宜濃醉後論掬嚼
玫瑰

月餅

麪色含環膩酥香夾桂濃設當清夜半疑墮紫雲
重啗學金蟾蝕擎看玉兔春年年競光彩似為照
塵容

餠

黃黍如黃玉炊成小甌餠摻摻搏素手閃閃落霜
刀不負重陽會休誇一世豪誰從千載後拈筆繼
風騷

棗脯

一色臘脂顆長竿落曉風銅牀烘細白玉指剝皺

紅食蜜何沾著無心是本空
客來茶供好珍重啓
筠籠

春日冠霞堂小集

天末高風起城隅宿霧殘
空庭騎馬到佳句把杯
看桃靨小紅發蝶翎新粉乾
吾廬似清景更繞碧
山寒

再題觀瀾亭

名泉得重尋一曲俯亭陰
古梵別通脉春瓶爭汲
深流珠侵客袂空綠上僧琴
漸遠風塵味松根坐
洗心

劉此亭過訪出示新詩即次其韻二首

春歸雨連日朝爽喜新晴
客到圍棋坐風傳落子
聲排烟山脊翠臨水竹濤清
處處濃紅紫登樓眼
倍明

兼旬悲索寞何意故人來
得意哦新句為歡登舊
醅尊前翻白雪門外靜黃埃
半里城南路過存日
幾回

初夏之春草莊二首

十里西郊路籃輿故緩行
棟花遮板屋酒旆出村
棚鳥影飛還下溪流
曲自清投閒來別業
真欲謝浮名

夏淺却勝春園林雨氣新
斷雲留不去野客坐相
親楊柳綠垂地櫻桃紅
照人飽尊更清美取醉倒
烏巾

櫻桃

山園燒筍日小樹亂鶯
雜豈比上闌出還如西蜀
無寶光沈韎韜女艷凍
珊瑚試向銀盤寫紅香拂
酒壺

大暑遊龍洞

觸熱城東去纖絺白汗流
山深藏佛館林杪得龍
湫石柱青苔徧銅甌素
綆浮却愁雲卧冷松色轉
巖幽

呂仙亭是日有
禱雨者

曾是朝真殿兼為避暑宮
酒香浮重碧瓜熟剖深
紅乾曠悲天意滂沱仗
雨工何當應精禱膏澤
編寰中

西洞

草荒人跡少，洞口路微斜。
朱夏無三伏，青昊自一家。
垂簾漾湘水，布簟結蠻花。
不忘仇池穴，朝朝躡彩霞。

江村次韻

門開意蕭爽，何必住巖幽。
荆柵龜蒙鴨，茅欄甯戚牛。
秋烟一林亂，夕霧滿浮江。
欲覓蘆中隱，汝頭自放舟。

村店題壁

犬吠繞村籬，行人唱竹枝。
野橋新雨後，茅屋晚春時。
紅米出泥甌，黃醅傾瓦卮。
歸心何太切，翻怪曉雞遲。

自閩中歸來雜詩六首

舊國經年別，蠻方兩月行。
風塵靈劍氣，江海播詩聲。
倦客驅車返，嬌兒把袖迎。
團圓真好事，淹泊笑勞生。

踽踽天涯意，泉西復叩關。
辭家豈長策，臨鏡忽衰顏。
白駭奔龍水，青愁插劍山。
所親煩問慰，羈客早思。

思還

遊子歸何晚
慈顏覺暗傷
無端隨北使
偶爾滯南
荒歲月新詩
卷星長
舊草堂
迴頭閣
嶺夢空
憶荔
枝香

自返山中駕
休開竹底門
人情遽如此
吾道總難
論
雪響連天
鴈燈明
獨夜村
楚辭
渾懶讀
剪紙欲
招魂

閩川冬亦暖
風壤重堪思
鸚鵡傳言語
檳榔致禮
儀市門
蕃錦繡
海舶漢
旌旗
更送官人
遠邊情
要
備知

龍鍾三十九
往事各星星
壁甯從鼪鼯
原飛念鶴
鷄
乘春行
藥圃
擇地起
茅亭
舊約連
牀雨
彭城尚
擬聽

枕流臺看雨

驟雨渾迷野
重雲不露峯
炎蒸豁天地
霹靂闢蛟
龍
黃潦遙驚眼
銀河直溢胸
惟應勤秉耒
膏澤徧
秋農

秋聲館坐雨

人間秋已半天宇尚重陰不負連牀約多煩冒雨
尋寒園通徑小幽桂坼花深會待三更後冰輪出
翠岑

閒適

曠野斷行人柴門一水濱秋高度鴻鴈霜晚出松
筠薦辟何關我逢迎懶著身辦香金粟側自覺遠
風塵

秋聲館讌集三首

秋宅闕來久通行只數君倒階惟亂竹度閣有高
雲畫軸江山展牙籤典籍分佳時類讌會無使暫
離羣

螺髻排千點鮫珠繞一遭黃低攀野桂紅小擘山
桃晚院陰涼滿秋空氣象高杯前無限興手握紫
金螯

卜夜還留客虛廳轉寂寥畫欄憑蟋蟀銀燭見芭
蕉舉酒徵三雅搜詩挽六朝言歸殊未許河漢影
蕭蕭

竹旬道中

城東十餘里霜氣辟塵埃烏帽穿林出青驪過水
來遥知茅屋閉剩有菊花開彌月疎詩酒忽忽未
擬回

慎影堂秋色同人分賦

隱者東村裏才名世久聞升堂燕唧唧卷幔蝶紛
紛綠野多紅樹青山半白雲幸逢陳大與賈息團吟
賞到斜曛

重陽前一日集慎影堂

村僻關門早燈明置酒宜螻蛄啼夕圃菡萏折霜
池琴擬嵇康奏詩兼宋玉悲龍山接重九應不負
心期

瓶中枸杞

向來蟠古甃今且貯寒甌子弄秋珠赤叢拋晚錦
青圖書深照耀霜雪後凋零一味甘濃極分沾茗
椀馨

南川

別汝南川久重遊事可嗟紫巖偏細菊青壠自寒
瓜鞍佩乖心計乾坤老鬢華歸山定何日置酒愧

田家

題丹陽觀壁

曾尋楊道士攀躡記秋殘白鶴雲中放金桃露下
餐賓徒非宿昔樓觀益高寒日暮愁歸去山螢照
馬鞍

小松

盈尺千年色孤根萬壑寒藉苔猶弱植垂石儼雄
觀虛閣通雲月高窓集鳳鸞何當參扈從博取大
夫官

初冬樓上

凌晨清盥罷初日海東紅寺寺山交霧村村樹偃
風輕蹄觀獵馬高翼數冥鴻坐入荒寒色危樓亂
竹中

雨夜感懷

十月雷還殷三更雨又懸斜侵來卧内紛聒到愁
邊兄弟有今日親朋非昔年蓼莪詩可誦不著遠
遊篇

寒夜訪陳賈二子

谷口居非遠山陰興可乘
重扉勞啓鑰高館續燒
燈薰論陳琳切風驟賈誼能
人生貴良會誰怯夜
寒增

新寒

青女霜何早飄花點鬢凋
村寒多閉戶野曠火登樓
烟水鳧鷖散園林橘柚收
蕭條怯冰雪深仗木
綿裘

喜孔散章外甥至

荒村冬已暮車馬忽遙臨
見面燈陪喜留人雪示
深棋應重疊覆詩或短長
吟此會休輕放三年契
潤心

散章將過我為泥濘阻賦此寄之

幾日東村會何時訪郭西
且知冰滑道還恐雪融
泥紙閣看人掃柴門聽馬嘶
文場雄俊輩兼欲盛
招攜

雪夜

雲屯歲將暮大雪夜相侵
戶牖不聞響園林惟覺
深就衾誰穩卧擁鼻獨長吟
明日南樓景山山白

玉簪

慎影堂席上

闔戶金爐煖開筵樺燭長故情逢春屬餘論涉文
章杜酒如春碧劉梅近臘黃坐深忘夜久簾影月
兼霜

雪後野君三兄攜散章甥見過小集二首

雪天晴正好意緒未應孤照日溪旁舍浮烟竹下
廚客來披鶴氅詩罷握龍珠斟酌果園會寒家得
似無

馳書良友至置宴洽同情賈誼雖才子劉牢有外
甥城烏烟翅急院柳雪條明物色兼懷抱深憑酒
細傾

高且園指畫二首

指端能作畫花鳥更清妍墨寶當時重宗風幾葉
傳掃除春壁粉攜挂暮溪烟不待天龍座觀圖已
悟禪

長史曾濡髮蛟螭鬪酒酣法曹兼染指鷗鷺點江
潭開闢誰敵仙真夢獨參時流共傳效捫壁得無



國家圖書館, NATIONAL CENTRAL LIBRARY, TAIWAN, R.O.C.

無慙

冰壺詩集卷五

歷城朱令昭次公

七言律詩一百十九首

賦得寒食東風御柳斜

漢苑緋桃散粥天
嫩金織翠劇堪憐
千絲長信宮中雨
一片朝雲館外烟
毬逐校門縈彩隊
馬盤細路染香韉
永豐樂部銷魂曲
幾度臨風憶往年

春草莊

野草無媒野徑賒
側峰斜嶺似嵇家
夕陽小圃雙

飛蝶遠水孤村幾點鴉
剝啄雲扉拖短杖敲斜烏
帽插濃花山童劊藥歸來晚
踏破橫岡半畝霞

張榆村賦長句見貽依韻報和二首

江山秀發冠羣才手縛麒麟物象猜
鴈下黃沙詩窟險崖磨白刃戰場開
千篇錦自筆端出一片心從天外來
吞嚼幾忘身與世飈車高駕覽蓬萊
竊眈文章費抉裁忽驚破柱一聲雷
自慙燕石居竒貨誰識秦箏有剩哀
湘水古龍潛月動天閑老驥絕塵來
祇今雄應無敵金薤琳瑯次第開

水潮寺看蠟梅

雪封濃蠟一株勻
京洛寒姿媚小春
淨色可參黃面老
古香真是素心人
玉烟金水能留夢
越白江紅未絕塵
見說壽陽宮額俗
維摩榻畔倚花身

殘春

瞥眼韶光客自驚
飛香流艷不勝情
重拈京口懷人句
更擬山陰載酒行
葉暗薔薇深翠老
葢分芍藥曉紅輕
可能更駐東皇駕
從此濃陰屬燕鶯

問君次默存兄韻二首

醉魂方出黑甜鄉風擊簷簷冷韻長水竹近名新
碧玉蠟梅別號小黃香擬憑妙手玉摩詰畫出間
人白侍郎何處塵埃飛得到藤梢橘刺滿山莊
冬青樹下白雲扉世事年來種種違飲酒畧安彭
澤性灌園久息漢陰機欲尋桐水人何在重話桃
源事已非閒數亂鴉茅屋裏夕陽又送釣船歸

夏日遣懷四首

年來習靜却諸魔玉觀金堂世外多積水浮山搖
劍戟長風出谷吼蛟鼉朝看蠶女條桑去晚聽牛
童叩角歌會得南華玄妙旨敢將詩力闢陰何
纖塵不許到階除竹裏人家水上居放杖嵩高終
未得買田陽羨復何如向來犀首惟耽飲近日虞
卿但著書永晝黃梁炊正美依然清夢繞蘧廬
膽瓶花謝甲香添風掩窓扉晝下簾朋輩十年懷
舊雨文章一世笑輕縑新荷黛綠如盤整大杏金
黃似蜜甜襪襪塵中紈袴習田園樂事許誰兼
能於恬靜著工夫撒手顛崖是坦途柏子一爐熏
性定雲華三椀潤腸枯紫藤棚底攜磁枕黃菜花

中響轆轤試向虎頭求粉本滄洲高趣不曾孤

雨後

風吹小雨白絲斜涼影淒迷透碧紗泉眼流來肥
似乳花腮洗得豔如霞濃槐蓋地蟻分戶香蜜滿
房蜂鬧衙瀟洒濟南真不忝櫻桃纔過又梅鰕

挹青樓夜坐

白紵黃葛起聞身方口燕川舊隱淪口業欲除偏
結習道根猛者是前因樓高星漢光侵幔水漲魚
龍氣襲人消受松風坐良夜瓦鐺煎點雪芽新

贈王處士二首

紅屏如意碧蓮巾又向塵中作酒民鷹犬不同雲
水志夔龍自信廟堂珍道旁盡是朱輪客松下稀
逢白眼人榮落朝昏何足道惟餘空洞貯天真
黃泥五斗能湔洗百道清泉迸四隣世網難求雲
外物蘧廬好寄夢中身菊花雨似人情冷糯液缸
如道味醇消得半生燈火債楞嚴一卷夜相親

放言

大錯何堪鑄六州田園隨處得優游迂踈經濟悲

無用荒怪文章唾不休嘯志歌懷俱跌宕巾節
杖儘風流何當私淑鴉夷子春水三江一葉舟

夏夜露坐

漆園一枕夢難成何處風樓倚翠笙仰視明河占
兩象坐聞流水滌塵情無端飛鼠衝簷影不斷飢
蚊繞鬢聲蘄竹如冰知夜久蒼龍芒角轉松棚

白蓮

不是唐昌舊日移空濛烟水百千枝自臨沙碧橋
紅外誰見江清月冷時蒼苔林香薰玉髓醍醐椀
淨濯冰肌隨緣也復垂金粉肯學文殊淺畫眉

過李秀才寒碧書屋索讀新詩不見示出便

面屬書即題其上

瘦筇扶過女蘿溪一院重陰美箭齊世路不嫌干
日醉才情何惜數行題江郎瓊樹芳華歇郭隗金
臺舊迹迷毒熱可堪為大草戲將濃墨學書鸞

喜蓼莊九兄過訪

一日思君十二回流泉風竹每驚猜人如朗玉欣
重晤酒滿芳尊得共開邈李盛名齊美句鵲華涼

翠濯清才濟南秋似江南好攜手旗亭畫壁來

雨夜同蓼莊茶話

手繙青簡字如蠅涼冷蕭梢逐序增風撼繁聲秋
樹雨人依殘影夜窓燈十年潦倒心徒熱百計刪
除勢未能安得長蘆舟一葉前途好辦小乘僧

秋日雜興二首

朋儔散去剩空囊門徑蕭疎亦未妨頗有雲身清
夢寐了無冰炭置胷腸巖幽落葉黃埋屐雨後秋
菱紫浸塘此際應須陶謝手憑將詩句答流光
鈎簾澹坐氣蒼涼時復清飈捲素商過眼部華水
東注撩人思緒鴈南翔青苔院靜琴絲冷黃菊叢
深酒甕香擬作幻仙人不識每從塵世問行藏

高秋

竹繞泉縈屋數椽年來性體白琅堅惱人花月真
成夢醉眼文書不值錢七椀蜀茶清兩腋一聲朔
鴈下三邊高秋天氣渾蕭爽好置眉陽藥玉船

秋日分香園同張榆村賦二首

晚秋庭宇靜鳴禽苦竹叢踈一徑深屏却黃埃欣

倒屣拈將白拂共披襟細聽暗水煎寒竇不斷長
風颯暮林此境莫教塵俗賞與君冷曠洽同心
虛廳薄日肅寒陰銅鉢聲清倚柱吟浩浩石泉湧
香乳瓏瓏霜葉擺秋金門前過客非今雨世外交
情在古心酒瀉糟牀琴挂壁步兵無事但相尋

城南書所見

竹冠蕉帔道人裝柳市南頭看戲場綺語爭傳陳
叔寶清歌新聽蔡中郎溪橋壓擔朱櫻媚村肆浮
甌綠蟻香天氣晚來歸未得斜陽橫笛數峰黃

秋柳二首

金風幾樹弄參差猶近紅樓戀酒旗汴水東流人
不見陽關西去笛空吹即今蕭索添惆悵無復牽
纏管別離一色乾黃留斷縷荒村遠岸共紛披
疎影蕭蕭帶碧蟬無聊垂手大堤邊沙昏野路埋
荒棘露冷枯塘卧折蓮空羨陽雲通粉氣可能京
兆潤眉鮮便須一飲蒲洲上誰與王孫繫酒船

鷓鴣

喙如削鐵距離銀漆眼流光錦翼新霜葉曾驚紅

線網晨窓却上綠
瓊茵十分俊
猛關西將一段輕
盈掌上人何必
金籠雪衣女
錦囊風月不孤身

西馬

鋒棱瘦骨大宛驢
一尺千金買不辭
日閃龍睛光
紫鏡風梳鷹尾撒
紅絲邊臺此日無
征戰天仗何
年得傍隨
芻嫩泉香淮豆軟
良才坐食總堪悲

豆粥

然薪瓦釜沸黃梁
一斛珍珠瀉碧光
飢凍保消殊
鄭重咄嗟便辦
只尋常洛城桃萼
三春美御苑防
風七日香
勿厭清貧生理窄
肉糜自古笑荒唐

腐乳

淮南食品重黎祁
椒豔鹽霜點菊脂
妙質本空應
解脫元精自返
忽神奇盤盂
少設香全染
脣齒微
沾嫩不支
合與道人充法供
新炊雲子滑流匙

霜夜

華嚴讀罷斂神容
細籟微聞倒壑松
飛素只疑天
暈淡流陰不覺夜
光濃一聲明月樓
中笛幾杵寒
山寺裏鐘
此際洞庭應更好
黃柑萬樹影重重

贈劉此亭二首

莫將常數論盈虧，偃蹇如君亦大奇。
辛苦備嘗茶蓼味，窮愁三斷鳳凰絲。
才須善用羞黏牡，道本無為貴守雌。
何日隨緣婚嫁了，寸心為報海鷗知。
寒銅玄髮事蹉跎，漫笑青蠅亦解歌。
翻水文章能觸忌，如金談辯易傷和。
君今眼底窮交少，我更年來積毀多。
又見春工換楊柳，歲華滾滾奈愁何。

偶至西村

陰陰場圃散雞豚，又過溪南擺耜村。
疲馬曾非紅叱撥，老奴仍是黑崑崙。
風傳孤笛來漁艇，水齧寒沙出柳根。
須信太平真有象，催錢縣吏不敲門。

野鶴樓秋夜

一椀雲芽雪滿喉，斜川讀罷竹缸幽。
鍾傳黃葉村邊邊，寺月到桃花岸上樓。
霜樹烏啼高枕夜，草塘螢影捲簾秋。
飄飄遠夢誰驚覺，身在三江白浪頭。

殘菊

透簾涼月影娟娟，孤館沈吟意黯然。
老圃寒深秋欲晚，黃花殘後我猶憐。
連晨詩酒兼踈濶，一夜霜

風莫棄捐移向牀頭伴幽獨清芬仍到枕函邊

九日置酒西郊壩上

方袍圓帽去城西村酒沽來共客攜最愛簪花臨
野水不防落帽下長堤客有立堤上者指顧間風吹帽落沿流而下一時絕
倒寒山小寺迷黃葉古道秋風老蒺藜悵悵年年
過重九幾回搔首夕陽低

寓歎

風吹毛褐鎮蕭然水際門開黃葉前但使向人能
乞米不妨坐客竟無贖劉安得道真成妄齊豹求
名自可憐鶴在高柯魚在水人生適意本非顛

客吳門寄懷劉此亭

別家未別劉真長一舸江南客輿馳三十年中好
朋友二千里外苦相思鴈飛茂苑秋深夜鍾動寒
山夢覺時早晚蛇門買歸棹打篷黃葉雨絲絲

山居四首

消受朝涼與暮涼從教歲月去堂堂九層白塔松
關外一脈紅泉竹寺旁是處烟霞堪作主此中塵
土不飛光時須淨掃雙荷葉手啓金函道味長

底事捫心較燠涼山緣水契最難忘藥亭棋罷僧
初去蘿幌風清夢自長冠蓋故須爭禮法林泉到
處得踈狂眼中無復陶弘景誰識青村別有鄉
蕭森門徑碧叢叢蟬翼秋輕拂曉風玉乳濃含千
樹黑金輪高駕數峰紅時招朋侶皆方外學駐年
顏是靜中富貴浮雲何足數龍丘居士近談空
五粒松花落紫苔藓牀絕纖埃詩從谷口村
邊得客自廬山社裏來黃蝶乍飛新雨院白蓮初
浸野香杯欲煩小李將軍筆寫我山居金碧堆
公舒容淮南十二年歸來酒間賦贈二首
壯心落寞倚淮樓梅雨昏昏別楚州藻鏡有情憐
黑髮布帆無恙挂黃流風姿當日輕王劭才術而
今似馬周重賦西鄰雙古柏蒼顏白甲使人愁
十年蹤跡犯紅塵捲枕天涯雨夢新湖海不歸成
底事鬚眉相見各傷神柳絲樓裏山香曲荷葉杯
涼石凍春摩詰風流如昨日粗才應笑鼓刀人

秋聲

一庵燈火照山家鐘動西林轉法華老圃酸吟蟬

抱葉長河驚響應移沙急風作陣拋藤子密雨摧
棚戰豆花滿耳清愁腸欲斷故人消息尚天涯

鈴兒草

曾向黃山識小名石陰微雨看叢生輕銀籠處千
鬚倒膩玉穿將一索明裊裊碧霞長似挂團團白
露冷無聲不堪還上朝元閣入骨相思蜀道情

園桃一株甘脆特異曉起輒嘗數顆賦詩美
之

一樹垂垂短屋前凌晨猶帶露娟娟人非萼綠華
休摘果較中黃李更圓落齒輕鬆盡佳境入喉甘
美徹中邊橐駝生計非為拙取次嘗新已五年

山莊秋日

兩村鄰並四山圍時有村翁叩板扉高樹出牆丹
柿重曲藤蟠架紫瓜肥老牛負鞅朝登壠野繭繅
絲夜上機迹跡幽荒渾自得故知人事日相違

綠牡丹四首

永寧朱邸鎖蟬娟淡染新香撲錦筵洛北風華青
簇玉江南烟水碧粘天喚人鸚鵡春窓隔亂眼睛

蛭暮雨懸一檝飛傳蓬島去
徧將名字問羣仙
麻姑水殿起玻璃烟
葢濛濛露朵低
石黛約眉臨
鏡淺草羅籠袖倚欄齊
分明香海青蝴蝶
恍惚陳倉碧野雞
殊色從來聲價重
一枝應敵楚懸黎
玉堂空綠曉風清
未必花師染得成
苞坼歐園春霧細
瓣粘巫峽夢雲輕
蒲桃杯面浮光冷
孔雀鈿心倒暈晴
安用青蓮雕九品
天香夜降古先生
清華千葉影續續
宋玉東家敢效顰
雛雛鳳養成非竹
寔香蟬幻出此花身
翠微宮裏拈毫客
青翰舟中擁被人
一本千金向處買
滄洲風貌洛陽春

夜渡黃河至桃源縣

朝朝津鼓畫旗新
夜夜鳧鷖許作鄰
夢境遙通淮口路
醉鄉別似武陵春
三杯明月孤舟客
一枕黃流兩漿人
興極天涯不知倦
晚風柳岸指荒園

舟中偶感

又見垂楊坐細鶯
岸花飛送幾年情
屈指舊遊今五年矣
蕭蕭白髮家輕別
忽忽青春客易驚
新漲拍堤連夜雨
長風挂席半天晴
憑君莫唱江南好
未到江南

愁已生

高西園月夜遊焦山倍極豪興聞而快之寄

贈二首

甘露鐘清塔影長夜深歌管入蒼茫
千年人物風流盡二月江春花草香
怪石有庵題海嶽古碑無字認蕭梁
遙知觴詠乘高興醉墨橫揮老更狂
魚龍睡穩不教知畫舸乘流獨往時
六代雄圖金佛剎一杯空相水玻璃
卧看揚子春江月醉詠焦山古鼎詩
此會他年留粉本文殊座上老髭眉

贈高西園

日長門簿客來頻睡足方牀一欠伸
磨墨應勞病風手談禪偶現宰官身
蓮花採後還名巷西園寓採蓮巷
芍藥吟成別贈人題芍藥詩八首編傳同詞
破費才華二三斗江南烟雨可憐春

涵空閣懷古二首

滌蕩風塵襍穢情接天春浪五湖清
月明簫鼓新娃館柳暗樓臺舊酒城
虎氣盤山雲葉捲魚腸入地土花生
思讐未盡心難死獨向要離塚上行

高閣涵空酒復清
遠山如畫列前楹
舳練瀆開吳會
烽火蘇臺見越兵
香水空流西子恨
靈祠猶著伍公名
臨風無限升沈感
數杵鐘殘半夜聲

北齋漫興

結茅深在水雲村
斂退由來祕密存
花鑿珊瑚紅倚壁
石翔鸚鵡翠當門
睡鄉與覓池邊榻
歡伯相招座上樽
近亦為詩慕韓杜
精嚴律法豈輕論

南川

挂窓松柏蠹珠珍
隔澗春流漲碧潭
拾翠縈鬟鄰女慧
買紅纏酒社翁酣
杏花泥助營巢燕
柵葉風催上箔鷺
聞說丹陽十餘里
打包明日過南庵

小庵

年光棄擲總堪哀
特地看山洗眼來
石磴仄邊驢背穩
桃花深處寺門開
三間佛館修春醮
一脉神泉漱古苔
誰向巔崖發清嘯
驚飛烟翠撲行杯

柳泉觀

三度來遊把釣緝
村盤又見蕨芽新
鶯聲直似將迎我
柳影公然籠罩人
淒薄石雲飛冷^過丁東乳水

水滴成春蒲衣道士應賢者不勸燒丹勸養神

南寺

千林迴合開靈境一杖間拖到上方宿草碑陰金
剝迴夕陽潭影翠峯長牛歸崦路農蓑挂鴉集齋
厨佛飯香到此洒然空萬累憑教塵事海茫茫

靈泉寺

移花選石不勝忙偶墮清溪興未妨山橋泥滑失
初不為減芒屨躡雲沙界小牡丹搖雪佛燈涼踏枝野
鶴窺人語繞座山蜂趁酒香便擬含毫賦招隱春
風何處老劉郎

山居二首

評跋江山玉塵拈賞心樂事昔遊兼三春天竺迷
花雨十里揚州捲畫簾口業未除詩帳在醉鄉有
約酒籌添而今厭事投荒谷不用桃椎過士廉
提壺布穀滿村陂爛漫風光記一時苦筍試黍新
玉版小桃初學淡燕支斷霞殘雨過春寺怪窟狂
峰坐午棋安得丹青如顧陸手揮八幅錦江絲

張山人山庵

石乳淋衣石筍交野扉半掩不須敲白雲留客餐
松子青壁無梯見鳥巢山澤清臞殊不惡文章波
浪免相嘲古來顏跖同天網好共先生比結茅

秋懷十首

秋來病肺只高眠寂寞柴門老澗邊楓樹有園皆
火蒨菊花無地不金錢霜鴻歷歷新寒水雲壑昏
昏欲暮天入手年華渾浪擲傷心涕淚獨潸然
空郊騁望得歸遲雨綠霜紅但可悲擊水鯢終思
北化避人鼻且解東移飄零賓客公榮酒蕭瑟江
關庾信詩湖海何人搔短髮遙遙秋漢倚樓時
白鷗閒泛水亭孤繞屋長松野鶴呼山色和烟流
翡翠海光搖日上珊瑚畫脂每笑才資陋嚼蠟深
知世味枯城市古來推大隱釣車何必向江湖
一丘吾欲返耕桑安用藍田舊日莊秋水衡門相
掩映高雲錦石共蒼涼縛來寒蟹誇螯大摘下新
橙透甲香畢竟難忘心裏事搘筇無語立殘陽
枳槿籬中架數椽亂生篔簹竹自娟娟虛荒物態翻
雲手艱苦時名上瀨船盡日塵黃調馬路五更霜

白聽雞天因嗟涉世終何補城闕秋生又一年
久踈酒盞不看花賸遣愁心逐歲華城外北風吹
向晚坐中南客苦思家入簾殘月關河影背壁寒
燈兒女嗟秋氣漸高詩力退尚拈枯筆掃驚蛇
古人猶解話私恩友道於今不可論寶轂金蹄喧
白晝畫屏銀燭醉黃昏武陵貂袖空抄肉太尉冰
襟悵出門誰似干權劉夢得報書忙煞綠珠盆
寒宵漏板故遲遲老屋無人讀楚辭浦裏漁榔鳴
水葉山前獵火上風枝凜嶮甲第功高日經畧中
原年少時自昔英雄盡黃土霜天明月不勝悲
褒斜世路久曾經向後風波任打萍東海漫求童
子藥西垣選指少微星養丹虛室新生白歷劫叢
書舊殺青旦夕淮南賦招隱移文不愧草堂靈
昔賢埋沒已蒿萊白雪樓空鎖不開失路誰聞楊
子哭遭時獨羨賈生才尊前一段英雄恨江上重
陽風雨哀弔古懷人秋色裏不辭抱病強登臺

秋晚

白袷旋教換紫茸薄寒風色似吳淞秋盤手擘蓮

心苦霜戶衣沾竹翠濃野水細流疎密葉夕陽高
掛兩三峯騎驢準擬尋西寺知在烟霞第幾重

冬夜同王公舒小飲

我愛風流王右丞夜深過我策紅藤一爐紫芋山
房榻半樹寒梅酒庫燈論極江河翻齒頰吟枯天
地鎖肩稜高臺突兀空明月更好同君醉後登

蠟梅三首

程園當日賞奇葩映竹遮籬更幾家老盡檀心春
未覺光添金落月初華各鶯妬色終難似山麝評
香或亦差鏡裏新妝最妍好折枝誰挿綠鬟斜

鉛華不御色偏饒幾樹逶迤障薄綃未怕隴風寒
較切懸知映雪暖難消銅龍壺口開深淺金雀釵
頭影動搖黃土十年猶眯目飽看須倩蠟高烧
特地懸香小閣東馳酥點點信天工荆襄舊種推
孤艷坡谷新詩仗兩雄未有曲枝低照水從教冷
蕾半含風莫將輕篋塗黃盡添寫山茶數朵紅

山茶蠟
梅扇子

寒夜

靜聞城上改嚴更綠帳熒熒炙短檠童立欲僵因
假寐雞寒失次故先鳴病餘思味參著美卧内聞
香橘柚清學造英靈春幾日嘗新恐亦歲咿嚙

小松

五粒森寒一蓋幽僕夫移植自荒丘孤撐丹室雲
常宿半折銀牆翠欲流猿影直疑清挂夜龍身迴
得細蟠秋若除廊廟都無用良匠他年或汝求

臘月十三夜雪

雪片如瓊亂眼中夜分轉更攪寒空感時脈脈青
春近撫景茫茫白晝同深屋自埋香芋火小窻從
夏野梅風高眼合學袁安老一棹山陰興易窮

雪晴

無賴瑤華忽罷裁却乘新暖步庭隈遲遲簷雨非
時滴薄薄池冰近午開欲出還愁驕馬滑未招旋
報故人來諸峯依舊憑高數只欠撥藍入酒杯

陳方村送香櫞

嶺南風物紹霜晨黃縹如瓜帶葉新散作五和方
必驗味充三缶賜尤珍定宜芬烈搓纖手頗訝清

奇類故人欲剖寒金為兩盞芳醪一注暖生春

冬夜即事

夜久茅堂檜影清南隣幽寺北寒城觚稜霜急飛
鈴語埤垵風高上柝聲抱病身今成青瘦論文口
尚覺縱橫誰為新好同燈火落落陳生與賈生

寒夜小酌

高烧銀燭漏將闌藥玉船香酒政寬黃雀披綿肥
滿箸鮮鱗膾雪嫩盈盤古潭風起水聲壯老屋月
明霜影寒為報院梅凌夜發漫扶薄醉倚欄看

和人咏梅

綠髮尋春曲岸隈漫扶筇竹意徘徊古龍半屈鐵
枝瘦老鶴一聲冰蕾開藥絹光明圖妙質蓮幢清
淨禮如來江南喚起風塵夢萬緒銀霞首重迴

雪後登臺

獨上層臺鶴鬣飄晶瑩天地日光搖檜盤深黑垂
崖葉柳孕寒青拂水條馬語殷勤念關隴鷹身造
次薄雲霄何當策蹇乘新霽我亦探梅去野橋

無題四首

白曉迷濛啓綠房半簾晴日淡烟光風流曾逐鶯
花隊綺旒誰先姊妹行昨夜夢過金鴈驛頻年書
斷碧雞坊可知芳草天涯意多病文園亦自傷
花蜜新妝綠鳳盤春風十二玉欄杆牡丹院靜溥
濃露燕子簾深隔嫩寒人遠尚餘情可託日長惟
有睡相干舊題猶剩薔薇怕小字斜行不厭看
何處銀鞍白鼻駒憑將寶瑟數年華渡頭水急憐
桃葉陌上春狂信柳花鳳帶鸞裾凝露眼楚腰衛
鬢倚雲牙金衣公子多無賴啼上櫻桃望妾家
睡起嬌紅印枕紋玉容臨鏡靄氛氲十年夜雨梨
花館幾度春風荳蔻羸眼俊只宜青漆點髮香不
待紫膏薰金杯還酌高唐觀要借巫峯一朵雲

西園桃花初放即遭大風裁詩志惜

草長江南聽早鶯無端風急曉紅驚水邊飛過兼
人霓襟上飄來別我情酒興今春空艷下粉行當
日滿華清應知明月崔園裏石醋心中自不平

殘春

水曲沙波鳥語清飛香流艷不勝情重拈京口懷

人句更擬山陰載酒行
葉暗蓄薇叢翠暖榮分芍
藥點紅輕剝那九十春光促
破臘探梅憶雪晴

徵會

曉閣迎涼黃雀風寄箋聊復倩
巴童南臺妙筆雄
無敵謂怡東野新詩淡愈工謂蔣秋色欲來千里
外吾儕好辦一樽同賞心是處成佳會先向森森
綠玉中

秋夜小集

裊裊沈烟疊素髮相將促席翠筠間漫誇詩比冬
郎好且喜身如杜五閭半夜征鴻思楚水一天涼
雨唱蕭關放懷催進蒲桃乳透莫紅燈照醉顏

喜蓼莊九兄至

十年雲樹澗相思握手今朝慰別離仍是烟霞真
面目不忘琴筑舊茅茨寒聲一陣曉天鴈瘦影幾
行秋柳絲轉燭年華又涼冷西窓情話與君期

觀瀾亭

一派深穿積翠開銀潢倒捲勢雄哉光涵陰洞三
株雪響震晴空百里雷照鬢儼然姑射客流花得

似永和杯夜昏不用然犀看定有蛟龍戲月來

題山寺壁

層巒隱隱樹蒼蒼鐘磬無聲古寺藏
帶雨雲歸金盞潤銜花鹿過寶衣香
清秋待月吟空殿靜夜和雲宿
上方一種蕉參色相石巖冷處傲青霜

秋堂觀奕

勝負悠悠安在哉閒觀局外自銜杯
竹香人坐寒流繞槐子蟬聲細雨來
犀玉翻光儼軍陣龍鸞動影較仙才
阿誰賭取宣城守柯爛山青轉可哀

約同人遊龍洞

禹登山好翠雕鏤勝友良辰憶昔遊
却對海棠真一夢欲攀蘿萼復三秋
飄蕭澗谷沈雲冷寂寞蛟龍閉密幽
一帶錦屏儘虛敞故應高會待吾儔

重陽後一日怡園兄和詩不至東訊

夜來籬菊未全黃今日茱萸覺更香
試上高臺望秋色依然老樹撼斜陽
却緣對景成新詠便復臨風索和章
料得叢筍最深處金花小幅寫琳琅

登樓夜酌有懷顧廣陵

暗壁陰蟲聒耳號鯉魚風起髮刁騷相知鄴下劉
公幹不見揚州何水曹白菡萏花漁冷赤梅檀塔
塔梵燈高南樓夜久空明月獨自持杯捉蟹螯

對菊

修枝疎朵媚山村冷艷冥冥醉月魂多謝白衣時
送酒可憐黃雀也知思如君豈有風塵色對我猶
含雨露痕且喜歲寒知已在清吟終日傍籬根

偶成

嵇康正著絕交書風叫枯桑雪壓廬冰酒膠杯何
怪爾折金銷桂獨愁予孤窓日上猶貪睡短髮朝
來亦怕梳心比蔚州灰更冷人間恩怨總消除

河燈

萬朵金蓮水面開蘋洲蓼岸映低徊乍驚列宿紛
紛出宛似流鶻曲曲來碎焰微消秋露下冷輝亂
颺夜風催憑君莫擬然犀照波底魚龍或見猜

秋夜不寐

不成何夢枕棱搖涼入秋堂轉寂寥度竹螢光青
熠熠垂簷星氣白蕭蕭十年楚客悲相送一夕巴

牋坐獨謔還問酒杯歌管處幾人魂向別離銷

過廢宅有感

野夫久息漢陰機富貴繁華事總違繡杵香砧秋
夢破豐貂長組昔人非殘蟄泣月官槐老冷雨鳴
階苦薺肥四十年來怕迴首班荆莫話舊烏衣

聽雨

秋天何處雨縱橫枕上傳來草木聲不共深燈關
小院却隨寒角遶高城風雲變幻身將老江海波
濤夢屢驚期向西巖醉紅樹巾車端可趁朝晴

問菊

黃花與我別經年又過龍山九日天烏帽自斜霜
蓋外玉樽誰獨晚叢前擬探消息身兼杖欲寄相
思墨滿箋倘得青盆移數本荒庋猶可薦寒泉

霜

已見房星昨夜高崑崙氣運轉蕭騷樓臺矗日黃
花尾鴛隼搏空白錦毛殺伐危機終莫測披猖異
類欲何逃鳴笳幾處遶風起吹落光芒拂寶刀

冰壑詩集卷六

五言絕句詩四首

蘆鴈圖

月 漁燈沙際明十里蘆花雪中有銜蘆魂江風吹秋

王石丈霜天曉驛小景

棗紅芻馬驛霜白聽雞天為報長征客寒深早著
綿

觀獵

四野白微微
茅紅掣兔飛
少年美如玉
盤馬正分圍

雪

四大殊湫茫
萬里風冷冽
誰為謝惠連
賦此梁園雪

六言絕句詩四首

題畫扇

湘浦烟霏交翠剡
溪花雨生香掃却人
間炎暑招回天上清涼

贈劉寒玉徐懷仁

落花撲簌紅雨洒
墨淋漓綠箋劉文喜
逢今夕徐君美似當年

西園雜興二首

園亭雖復荒冷何曾廢
我嘯歌滿地泉穿修竹
一天雨響高荷

鄰槐著雨花落上下青
蟲對閒休說南柯大郡
而今夢境闌珊

七言絕句詩一百二十七首

林菊如秀才過訪二首

春寒連日醉昏昏
剝啄聲傳水際門
可怪孤山林處士
青驢騎到落梅村

小閣踈簾燭影清
吳歛音節記分明
柳花一曲腸應斷
不用琵琶第二聲

春暮訪邢聿修四首

聿修攻詩師田香城

舍南舍北家家雨
村後村前樹樹鶯
一路野花黏屐齒
又隨黃蝶過春城

日穿蒼雪午陰繁
商畧煎烹坐水軒
臙鼎腥甌都却棄
為予點試小江園

前輩香城老居士
金拳說法定才人
須臾變滅空

花裏剩有維摩示病身

時聿修抱恙

乍看桃李艷芳株
取次間庭老綠蕪
燕待得含桃紅熟後
相尋重佩紫微壺

詠古四首

珍珠撒指坐寒廳
淨業編辭貝齒靈
想見臺城秋夜雨
梁家宮殿濕螢青

南陽名士壓清班一觀瑤華一解顏讀到小園枯
樹賦惱人情緒滿江關

說法鴛鴦寺裏時偎紅抱翠亦情癡可憐玉樹花
零落不見金釵兩鬢垂

天藻風流御墨鮮蕪城烟月住年年選詞剩有江
南好倚楫無人似絳仙

粥

曝背晴簷日上時紅蓮香稻喜晨炊俗夫那辦洪
崖飯鹽筍油菘獸乳麩

豉

杏子薑芽八品題沙瓶初試小刀圭從今莫更嘲
王武羊酪全輸豆蔻泥

酥餅

記得鳴牙餅子無清芬甘軟出紅爐一盤送與東
坡老不數劉家為甚酥

筆管煙

一枝瑩管玉清虛小技雕蟲愧不如應是董狐靈
爽化龍堂刀筆考中書

大明湖北岸觀劇二首

一雙跳脫玻璃玉三尺琵琶綠繭絲不唱齊梁殘
樂府野花黃蝶譜新詞

楊柳輕含玉笛風銷魂桃葉雨濛濛蘭橈爭傍蘆
根倚驚起沙頭白勃公

題顧桐陽海棠木瓜小幅

濃紅點綴古黃斑天女維摩兩法顏迴與徐生風
味別海棠窠在木瓜山

紅白菊花

橙黃橘綠晚秋時淡白疎紅裊裊枝一掬清芬詩
鬢冷碧桐陰薄夕陽遲

漫興二首

不衫不履意相羊庭際槐花吐細香上有青蟲學
抽繭好風吹落桂繩牀

鳥韻如簧醒晝眠榴紅向午色逾鮮滿園蝴蝶翩
翻舞可是金錢與玉錢

夏日閒居四首

疎柳高梧映碧紗北窓夏景最清華鄰僧好事頻

相訪自煮宣州綠雪芽

側帽迎涼小院中
綠香瓜果浸冰籠
東閣雨歇微風起
零亂桐花叫郭公

垂簾晝永靜書龕
日映甘蔗露氣含
蝙蝠飛來紅似火
無人知是綠天庵

石盆荏苒玉簪抽
盡日攤書坐竹樓
漠漠涼烟天欲暝
一聲漁笛蓼花洲

偶出書事二首

稍覺涼風散鬱蒸
夕陽村落策紅藤
丁東何處敲

銅椀曲巷兒童喚賣冰

壚頭斜插小青帘
滿眼詩篇信口占
潑墨雲濃天欲雨
人家齊下棗花簾

林居秋景

平湖秋水浸寒空
古木蕭蕭落葉紅
石徑小橋人跡斷
一庵深鎖白雲中

山居四首

出山五日始歸山
却被山靈笑我頑
若道此山歸不得
應歸三十六青山

金雀花棚坐蒼石
鷺鷥藤架挂烏巾
晚來濯足北溪上
半嶺松風吹過人

昨日天民莊上去
野人留看牡丹花
今朝飯罷無此事
又喫南泉寺裏茶

雲扉深靜鎖烟鬟
更隔紅霞三四灣
高畧踏青何處好
野人西指鳳凰山

題畫十六首

山眉遠畫黛痕浮
點綴橙黃橘綠秋
風蹴江頭浪花起
載將離恨滿孤舟

層層近見山蒙繡
一一遙聞鶴唳空
知是宵來大風雨
桃花狼藉寺門紅

滿店梨花楊柳枝
五年前是別離時
金堤明月揚州路
夢裏徘徊畫裏思

老牛浮鼻沙水清
小牛登岸氣崢嶸
藉蓑一覺槐陰睡
齧草忽聞風雨聲

颯颯北風起
鴈臣凌波孤棹月
華新蘆中殘笛沙頭火
盡是長江萬里人

小景悲涼未可收
荻花楓葉拂船頭
無端更泊潯

陽雨一夜琵琶瑟瑟秋

幾層紺宇深深見萬樹黃松密密圍不記何枝挂
猿影風吹殘雪落僧衣

鴉路連雲木葉丹捲簾秋水澗雕欄中間著箇香
山老便是龍門八節灘

老翁腰脚懶躋攀袖裏紅藤信步閒我亦胸中有
嵩洛愛看平遠寫溪山

野月如霜水映空遠洲渙火一星紅無端吹亂蘆
花雪定是羣鴻鼓翅風

黃泥坂上霜花大赤鼻磯頭月色新不畫周郎畫
蘇子英雄到底讓詞人

鸚鵡成羣自在鳴陰崖深箐僕夫驚人情歷盡風
波惡又放烏驪雪棧行

琉璃寶地栽楊柳金翠雲屏點絳桃正是西湖最
佳處一旗風颺酒樓高

老槐圍屋暑風清獨咏孤斟豈世情明月滿畦蔬
菜影夜深聽放轆轤聲

葉下瀟湘客欲行一樽相共慘離情寒蒲十幅蕭

蕭雨並作陽關意外聲

翠壁為牆著幾家
斷橋紅樹倚風斜
詩非靈運休題品
此幅江山似永嘉

有憶

人去樓空惱夢思
一秋斲酒不吟詩
關門獨對黃花坐
虛過鱸肥菰脆時

新柳三首

今年二月已清明
薺麥青時楊柳青
遙見酒旗高挂處
輕烟漠漠水西亭
嫩色如金細撚條
憐他仍是最纖腰
琅邪人散豪華歇
短帽疲驢憶渭橋
手種垂楊近釣磯
於今已大兩三圍
柔條渾似千絲網
網得春來不放歸

清明四絕句

美人樓上捲羅衣
青粉牆高水四圍
欲去不能留
不可滿空紅雨白綿飛

冶遊年少是誰家
箏笛紛紛雜笑譁
花裏玉觥黃字酒
柳邊金犢紫簾車

半肩斜鞦梨雲白滿帽濃簪杏粉紅薄晚歸家燈
未上鞦韆明月畫樓東

小樹玲瓏結紫烟高烧銀燭畫簾前夜深獨自追
清賞明月家家寒食天

板橋絕句

河繞春城綠水溫沿河兒女拔蒲根一羣花鴨衝
波去認得橋南楊柳門

答劉此亭

君誦新詩我醉聽至今牆角卧長瓶無人更到維
摩室雪北香南待此亭

雨夜

荷葉聲清雜竹枝不堪涼雨動秋思呼兒半夜燒
殘燭是我移牀避漏時

舟中口號

黃篋樓陰柳拂窓水聲風勢兩春撞眼看春盡櫻
桃熟便買鱖魚過鎮江

瓜步

一篙春水綠於苔鴨船輕向晚開渡口斜風吹細
細雨春帆無數過江來

紅杜鵑花

何處山榴花最嬌虎丘南下兩三橋山風吹起通
紅火一片春空焰焰燒

白杜鵑花

蜀王宮裏人如玉幻出名花繡五稜柳絮飛時江
上雪爭教清淚不彈冰

水紅杜鵑花

無奈催人歸去何騰脂口血漬纖羅怪他紅色新
來淡簾外春陰雨洗多

紅白杜鵑花

白花界
以紅縷

謝豹花開縹色盆滿簾寒雨細昏昏何因不見陽
城笑紅淚如絲破粉痕

黃杜鵑花

一株千朵壓羣芳種向金盆爛曉光望帝魂歸招
不得春雲剪下御羅黃

客舍淺斟聽雨

一棧林檎酒色佳，
可堪孤客滯天涯。
吳王苑外聊蕭雨，
飛送愁聲到館娃。

客中送春有感

淅淅關河繫所思，
况當風雨把離卮。
即今客舍春歸日，
應是高堂淚落時。

孫堅墓

草亂松深沒廢丘，
闔閭城外曲岡頭。
江東自古多豪傑，
第一應稱孫豫州。

梧桐園

想見吳王一段愁，
行人猶為故宫留。
不須葵扇搖輕暑，
颯颯梧桐早似秋。

放舟虎丘留別諸子四首

初到吳宮柳似鶯，
歸時水面點新荷。
無端隔岸琵琶女，
喚起江臯離恨多。

棟花風裏酒重沽，
畫出河梁小別圖。
去去仍還留一語，
明年二月到姑蘇。

舉眼桐橋別思繁，
順風猶聽管絃聲。
多情最是金昌柳，
泣雨啼烟送我行。

停橈把酒未嫌頻到底情深話亦真醉別江南志
不得虎丘山下兩三人

題董茶村畫

白甕青缸水店間扁舟跂足弄淙潺君應近代倪
黃手短幅離離寫惠山

送茶村旋江寧

家山迢遠夢魂驚君又將歸我送行四月黃梅屛
浦路數聲柔櫓到南京

江口

春暮南遊夏淺回避風館畔好懷開江船日午炊
烟起尺半鱖魚入饌來

懷四兄

別後相思日幾回江東吹笛暮雲開可知春草池
塘句小弟親曾入夢來

對菊懷耿柳村

夏幄陰濃綠倒披如何已見傲霜枝故人曾有黃
花句却是空濛小雨時

柳村舊有句云小
雨空濛菊上盆

過野市

撲面風來野市香
桃如水蜜店金黃
故園正復饒
佳果不喫楊梅亦不妨
北歸時楊梅未熟

黃山店

黃山野店郡城西
歸客看山日向低
阿漚雙雙穿
麥壠更無人處盡情啼

蓼花

柳外楓陰秋水灘
老漁擎著尾杯看
打篷江雨晚
來急紅穗紛披蓼笠寒

來急紅穗紛披蓼笠寒

弔李于鱗墓二首

詩人於此寄精靈
白晝楓陰撲馬青
一片寒山一
抔土瓣香來哭李滄溟
玉樹沈埋日月昏
蠅聲蚓竅徧荒村
一杯還酌風
騷主黃葉深深擁墓門

贈僧

不愛浮名只愛閒
老僧八十住青山
莫欺白髮如
霜雪依舊清羸片玉顏

柳泉觀二首

細雨平沙鹿跡深
千崖秋氣此登臨
琳宮更在仙雲裏
風送泠泠玉磬音

曾記春風倒玉卮
小桃^花頰粉紅時
重來照鬢臨秋
秋水一樹垂楊挂碧絲

入城過鐵腳嶺口占

揶筇嶺北秋逾老
回首山南日已斜
未免歸來有
遺恨不曾西寺看黃花

老少年

當窓五色爛朝暉
大剪臨風劈葉肥
強擬少年終
不似開箱看取老萊衣

草桂

簇簇金黃水半灣
鱗鱗鴨綠寫清孱
無人知是天
香種埋沒尋常草莽間

玫瑰秋花二首

葉雖黃盡未辭枝
已是清霜乍落時
可怪三花兼
兩朵石牆西角冷胭脂

滿院風披露菊鮮
玫瑰也復弄秋妍
只如讀徧斜

川集中有閑情賦一篇

題畫為大兄作

原上類年感脊令秋窓始得共銀餅梧桐樹底芭
蕉外莫當尋常夜雨聽

春寒

作底春寒旦夕加陰陰連日雪紛拏未愁深凍簷
前水却恐遲開陌上花

為張榆村題畫菊扇二首

本是崑崙墨擬痕染成瘦石似龍躡倒枝更為寫
寒菊冒雨不知誰打門
蕭颯西風扇角邊故人高格想翩翩何當共坐黃
花雨竟夕論心十載前

聞步至水潮寺

清溪流影棹歌回簇簇黃花古岸隈采得秋香投
野寺一堆紅葉殿門開

柳

竹樓高處柳濛濛雪白花飛夕照紅記得江南曾
惜別吳門細雨晚烟中

蘭

一本花開數十枝高低疎密側還敲
偏於夜久聞
蕪澤微雨深燈讀楚詞

七夕限韻

拋却金梭鳳不銜
緩拖雜佩玉
摻摻可知高架雕
陵鵲只似秋江一葉帆

遊仙詩十首

晞髮長桑露氣晴
三花樹底多鸞笙
到門解說長生理
只有茅家好弟兄
朝遊紫海不騎魚
鳳引鸞旌鶴引車
吟得步虛誰解和
歸來閒倩少霞書

不到麟洲五百年
重來風景尚依然
稚龍化作黃衣女
親問東華古玉篇

十二瓊樓切太清
銀河隔座瀉寒聲
翠鸞叫起瑤臺月
人在仙家第五城

蓬萊水淺不容刀
欲借瑤池駕六鰲
阿母裁書報龍伯
仙源只好灌蟠桃

子登結伴婉凌華
夜下三洲小玉家
閒說紫陽宮

裏事海風吹放碧桃花

紫府仙娥玉雪姿生來即遣侍瑤池九關隔斷塵
凡路說著人間總不知

海上風高冷翠璫扁舟穩載水仙王戲將一掬蓮
花水乞與神龍作雨香

太帝雲車駕白麟朱兵前導衛羣真天音親問陽
翁伯可是盧龍種玉人
鳳字龍文玉葉栽金扉深鎖不曾開茂先大有仙
緣在親到瑯嬛福地來

、夏夜

因多詩思類添酒為愛荷香不下簾趺坐匡牀涼
夜靜疏櫺風細月纖纖

、題畫柳

數株疎柳碧毵毵柳外青山繞夕嵐多少天涯未
歸客却從畫裏看江南

、與九兄夜話二首

黃葉因風入戶投濕螢點點破深幽一聲暮雨銷
魂曲不到蕭關水盡頭

試茗留香意絕塵周郎妙筆好傳真芙蓉小院芭
蕉雨一穗紅燈照兩人

秋日漫興

日斜樽俎置籬東黃菊相依發故叢自笑年華似
秋葉都教容易付西風

賞菊二首

瀟洒度軒靜不詳論文酌酒興無涯芙蓉瘦盡秋
風晚又見東籬菊花放
小立西風著意看收將秋色上毫端一樽相對成
真賞未肯移情愛牡丹

理殘書有感

白藤花篋蠹紛如日色當軒自掃除忽地沾衣數
行淚無心繕著故人書

幽居四首

幽居長夏興無違拂拂微風透葛衣無數白蘋開
綠沼紅蜻蜓出帶香飛

乍聽林外響提壺倏見雲屯集萬鳥送目南樓烟
景好石村水店雨模糊

風飄桐乳落池輕
蘆檝楓窓淡
遠情擘箇小團陽
羨月殷勤分向翠花鐙
蕭然藤帽與棕鞵
習靜攤書坐竹齋
玉案清芬人不識
特標名字挂銀牌

秋盡日作

芙蓉楚楚亂峰斜
沙曲平消水半涯
落葉滿園霜氣冷
還從荻徑數秋花

寒夜

一盞寒聽戍鼓敲
朔風吹透讀書巢
襄陽夫子歸何處
酒灑江梅雪後梢

村居春日二首

梨花村閣月冥冥
交映疎窓棟葉青
恰正幽人眠未起
春田星露響牛鈴

杖藜閒步晚春天
風軟游絲趁柳綿
身在右丞詩句裏
夕陽一半似秦川

題畫

百道飛泉濺客涼
不知塵俗在何方
洞門深鎖長藤影
似有琴聲出石房